

MESYUARAT PERTAMA, PENGGAL KELIMA
PARLIMEN KEEMPAT BELAS
2022

HARI SELASA : 22 MAC 2022

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 5, 11 HINGGA NO. 81)**

NOTA : [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SYED ABU HUSSIN BIN HAFIZ
SYED ABDUL FASAL (BUKIT GANTANG)**

TARIKH : 22 MAC 2022 (SELASA)

SOALAN

DATO' SYED ABU HUSSIN BIN HAFIZ SYED ABDUL FASAL [BUKIT GANTANG] minta **MENTERI KANAN KERJA RAYA** menyatakan langkah dan kaedah bersepadu Kementerian yang melibatkan pelbagai pihak berkepentingan bagi menangani permasalahan banjir kilat kesan daripada projek pembinaan Lebuh Raya Pantai Barat (WCE) Banting hingga ke Changkat Jering.

JAWAPAN

Tuan Yang Di-Pertua,

Jajaran Lebuhraya Persisiran Pantai Barat (WCE) ini merentasi dua (2) buah negeri iaitu Negeri Selangor dan Negeri Perak sejauh tiga ratus enam belas kilometer (316 km) di bina di sepanjang persisiran Pantai Barat untuk kemudahan penduduk setempat dan juga pengguna lebuhraya ke Utara. Panjang jajaran Lebuhraya WCE yang dilaksanakan secara penswastaan oleh West Coast Expressway Sdn. Bhd. (WCESB) adalah sepanjang dua ratus tiga puluh tiga kilometer (233 km) manakala jajaran sepanjang lapan puluh tiga kilometer (83 km) untuk menaiktaraf jalan sedia ada (FR5) yang dilaksanakan menggunakan peruntukan Kerajaan melalui Jabatan Kerja Raya.

Untuk makluman Ahli Yang Berhormat, terdapat kejadian banjir yang berlaku di Persimpangan Trong dan lokasi sekitar pada 17 Ogos 2021 dan 20 Oktober 2021 yang dikaitkan dengan pembinaan lebuhraya ini. Lanjutan daripada itu, pihak jurutera perunding telah melakukan pemeriksaan dan pemantauan di tapak. Sebahagian besar daripada hasil pemeriksaan yang dilaporkan adalah melibatkan isu penyenggaraan ke atas kerja-kerja longkang yang dibina dan pemantauan terhadap pelan tindakan kawalan hakisan dan kelodak (ESCP) yang perlu ditambah baik.

Pihak WCESB telah diarahkan untuk mengambil tindakan segera bagi melaksanakan kerja-kerja penyelenggaraan di lokasi yang telah dikenalpasti. Pada masa yang sama, tindakan juga telah diambil oleh jabatan dan agensi Kerajaan yang berkaitan seperti JPS dan Pejabat Daerah Larut, Matang dan Selama untuk menyelesaikan permasalahan kejadian banjir yang berlaku.

Justeru itu, pelan mitigasi bagi mengurangkan sebarang implikasi ke atas semua kawasan sediada di sepanjang koridor pembinaan Lebuhraya Pantai Barat (WCE) Banting hingga ke Changkat Jering telah dilaksanakan seperti berikut:

1. Membersih dan menyelenggara semua sungai dan saluran sediada dalam kawasan pembinaan Lebuhraya WCE sepanjang tempoh pembinaan; dan

2. Melaksana, menyelenggara dan menambahbaik Pelan Kawalan Hakisan dan Pemendapan (Erosion and Sediment Control Plan – ESCP) seperti menyediakan beg pasir (sand bag), pagar lumpur (silt fence), longkang sementara (temporary drain), penanaman rumput (turfing), kolam takungan mendapan (sediment basins) dan lain-lain amalan pengurusan baik (Best Management Practices) di sepanjang tempoh pembinaan sepertimana syarat-syarat kelulusan EIA.

Kementerian Kerja Raya (KKR) melalui Lembaga Lebuhraya Malaysia (LLM) sentiasa bekerjasama dengan agensi Kerajaan yang lain seperti Jabatan Pengairan dan Saliran (JPS) dan Pihak Berkuasa Tempatan (PBT) bagi memantau kerja-kerja pembinaan lebuhraya ini agar berada dalam keadaan terkawal bagi memastikan isu berkenaan kejadian banjir kilat dapat di atasi segera.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : TUAN CHE ALIAS BIN HAMID
[KEMAMAN]**

TARIKH : 22 MAC 2022 (SELASA)

SOALAN

Minta **PERDANA MENTERI** menyatakan perkembangan terkini pelaksanaan Pelan Tindakan OKU Muslim di Malaysia.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI (HAL EHWAL ISLAM)**

Tuan Yang di-Pertua,

1. Untuk makluman Ahli Yang Berhormat, Jabatan Kemajuan Islam Malaysia (JAKIM) dalam peringkat akhir menyiapkan Pelan Tindakan Orang Kurang Upaya Muslim (PTOKUM). Pelan ini adalah dukungan kepada Pelan Tindakan Orang Kurang Upaya (OKU) Kebangsaan dan juga dasar sedia ada iaitu Dasar Orang Kurang Upaya (OKU) Negara yang telah dibangunkan oleh Kementerian Pembangunan Wanita, Keluarga dan Masyarakat. Pelan ini akan dilaksanakan dalam tahun 2022 mengikut perancangan pelan yang telah disediakan.

2. Pelan ini akan dibentangkan dalam beberapa platform yang berkaitan bagi mendapat persetujuan dan kerjasama yang mantap, holistik dan bersepadu sebelum ia dilaksanakan. Antara teras strategik yang digariskan dalam pelan ini adalah seperti berikut:

- a. Teras Strategik 1:
Memperkukuhkan Dakwah OKU Bagi Kesejahteraan Ummah.
- b. Teras Strategik 2:
Memantapkan Penyelidikan dan Inovasi Ke Arah Pembangunan Kehidupan OKU.
- c. Teras Strategik 3:
Memperkasakan Pendidikan Islam Kepada OKU Bagi Kelestarian Kualiti Hidup.
- d. Teras Strategik 4:
Mengukuhkan Institusi Kekeluargaan Islam OKU Ke Arah Pembentukan Generasi yang Harmoni.
- e. Teras Strategik 5:
Meningkatkan Sistem Sokongan OKU Ke Arah Pembentukan Masyarakat Prihatin.

3. Komitmen Kerajaan dalam usaha menyantuni OKU bagi mendapat kefahaman dan penghayatan Islam ini membuktikan bahawa kerajaan sentiasa prihatin dalam memastikan tiada masyarakat yang terpinggir dalam mendapat manfaat dan perkhidmatan yang telah disediakan oleh kerajaan terutamanya yang berkaitan dengan keperluan OKU yang beragama Islam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN WILLIAM LEONG JEE KEEN
[SELAYANG]**

TARIKH : 22 MAC 2022 (SELASA)

SOALAN

TUAN WILLIAM LEONG JEE KEEN [SELAYANG] minta **MENTERI
ALAM SEKITAR DAN AIR** menyatakan :-

- (a) jumlah pelepasan Gas Rumah Hijau (GRH) di Malaysia untuk tahun 2005 dan 2016; dan
- (b) sama ada nilai Ringgit yang sama digunakan untuk mengira intensiti pelepasan GRH bagi dua tahun tersebut.

JAWAPAN

Tuan Yang Di-Pertua,

1. Untuk makluman Ahli Yang Berhormat, jumlah pelepasan dan penyerapan gas rumah kaca (greenhouse gas – GHG) negara telah dilaporkan di dalam Malaysia *Third Biennial Update Report to the UNFCCC* (BUR3) yang merupakan salah satu daripada obligasi pelaporan negara di bawah Konvensyen Rangka Kerja Perubahan Iklim Pertubuhan Bangsa-Bangsa Bersatu (*United Nations Framework Convention on Climate Change* – UNFCCC). Berdasarkan laporan tersebut, pelepasan dan penyingkiran GHG yang dilaporkan telah mengambil kira lima sektor pelaporan seperti berikut:

- i. tenaga;
- ii. industri pemprosesan dan guna produk (*Industrial Processes and Product Use – IPPU*);
- iii. pertanian;
- iv. sisa; dan
- v. guna tanah, pertukaran guna tanah dan perhutanan (*Land Use, Land Use Change and Forestry – LULUCF*).

2. Berdasarkan Laporan BUR3, jumlah pelepasan GHG pada tahun 2005 dengan mengambil kira sektor LULUCF adalah sebanyak 47.86 juta tan karbon dioksida setara (*million tonnes CO2 equivalent*). Manakala, jumlah pelepasan GHG pada tahun 2016 dengan mengambil kira sektor LULUCF pula adalah sebanyak 75.49 juta tan karbon dioksida setara (*million tonnes CO2 equivalent*).

3. Untuk makluman juga, kaedah yang digunapakai bagi melaksanakan pengiraan tersebut adalah berdasarkan kepada Garis Panduan yang telah ditetapkan oleh UNFCCC iaitu *2006 Intergovernmental Panel on Climate Change (IPCC) Guidelines for National Greenhouse Gas Inventories*.

4. Bagi pengiraan *GHG Indices* pada tahun 2005 dan 2016, nilai Keluaran Dalam Kasar Negara (KDNK) bagi tahun 2005 dan 2016 masing-masing telah digunakan. Kedua-dua KDNK juga (tahun 2005 dan 2016) dilaporkan pada harga malar untuk mendapatkan rujukan yang lebih tepat dan setara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD TARMIZI BIN SULAIMAN [SIK]

22 MAC 2022 (SELASA)

TARIKH :

SOALAN

Minta **PERDANA MENTERI** menyatakan usaha bagi mengekang penyebaran ajaran dan fahaman yang salah dari panduan Ahli Sunnah Waljamaah seperti fahaman bidaah dan khurafat yang masih berlaku dalam masyarakat.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI (HAL EHWAL ISLAM)**

Tuan Yang di-Pertua,

1. Usaha berterusan telah dilaksanakan oleh Kerajaan bagi mengekang penyebaran ajaran dan fahaman yang salah dari panduan Ahli Sunnah Waljamaah.
2. Muzakarah Jawatankuasa Fatwa Majlis Kebangsaan Bagi Hal Ehwah Ugama Islam Malaysia (MKI) pada 5 Mei 1996 telah memutuskan pandangan hukum supaya umat Islam di negara ini berpegang kepada manhaj Ahli Sunnah wal-Jamaah sama ada dari segi akidah, syariah mahupun akhlak.
3. Pihak JAKIM turut memberi tumpuan kepada memperkukuhkan akidah ummah melalui pembudayaan ilmu dan pentarbiahan yang komprehensif dan berkesan dengan kerjasama MAIN, JAIN serta agensi-agensi lain yang berkaitan. Antara pendekatan yang telah, sedang dan akan dilaksanakan oleh JAKIM untuk menangani isu penyelewengan akidah umat Islam di Malaysia ialah:

- i. Bekerjasama dengan MAIN dan JAIN dalam aspek penyelidikan mengenai ajaran dan doktrin yang meragukan atau disyaki menyeleweng daripada agama Islam.
 - ii. Mengadakan pertemuan dan sesi dialog secara tertutup bersama kumpulan atau individu yang terlibat dengan ajaran yang meragukan.
 - iii. Melaksanakan kajian secara menyeluruh dalam pelbagai aspek sebelum sesuatu ajaran atau doktrin itu diberi pandangan hukum oleh Muzakarah Majlis Kebangsaan Bagi Hal Ehwal Ugama Islam Malaysia (MKI). Ini termasuk kajian dari sudut kesan dan implikasi apabila sesuatu pandangan hukum mengenai ajaran sesat dikeluarkan.
 - iv. Jabatan Mufti di negeri mengeluarkan fatwa mengenai ajaran terbabit mengikut peruntukan dan bidang kuasa masing-masing berpandukan kepada pandangan hukum oleh Muzakarah MKI dan perbincangan di peringkat Jawatankuasa/Muzakarah Fatwa Negeri-Negeri.
 - v. Memberi kaunseling dan nasihat agama kepada mereka yang terlibat bagi membantu mengembalikan akidah dan kehidupan mereka kepada kehidupan normal masyarakat.
4. Selain itu, pihak JAKIM bersama-sama dengan agensi-agensi di bawah Menteri di Jabatan Perdana Menteri (Hal Ehwal Agama), turut menganjurkan program-program seperti seminar, wacana dan persidangan meja bulat sama ada secara bersemuka atau melalui platform media baharu bagi memperkukuhkan kefahaman ahli sunnah wal jamaah dalam kalangan masyarakat awam secara berterusan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN KHOO POAY TIONG
[KOTA MELAKA]**

TARIKH : 22 MAC 2022 (SELASA)

SOALAN :

Minta **PERDANA MENTERI** menyatakan status terkini Bantuan Wang Ihsan (BWI) banjir untuk tahun 2021, termasuk maklumat berikut :-

- a) jumlah permohonan, bilangan yang diluluskan, jumlah yang telah menerima bayaran, dan sebab-sebab utama permohonan ditolak; dan
- b) maklumat seperti di atas secara berasingan untuk daerah Melaka Tengah.

JAWAPAN

**DIJAWAB OLEH YB DATUK DR ABD LATIFF BIN AHMAD
MENTERI DI JABATAN PERDANA MENTERI
(TUGAS TUGAS KHAS)**

Tuan Yang di-Pertua,

1. Setakat 15 Mac 2022, Agensi Pengurusan Bencana Negara (NADMA) telah menyalurkan peruntukan sebanyak RM221.926 juta bagi tujuan pengagihan Bantuan Wang Ihsan kepada semua Ketua Isi Rumah (KIR) yang terjejas dengan bencana banjir dalam tempoh Monsun Timur Laut (MTL) 2021/2022 di seluruh negara.

2. Jumlah Ketua Isi Rumah (KIR) yang terkesan bagi MTL 2021/2022 di seluruh negara baru-baru ini adalah sebanyak 214,795 Ketua Isi Rumah (KIR). Beberapa isu perlu diteliti sebelum sesuatu permohonan diluluskan seperti:

- (i) Mengenal pasti mangsa yang layak mendapat keseluruhan atau sebahagian bantuan;
- (ii) Permohonan bertindih dari Ketua Isi Rumah (KIR) yang sama; dan
- (iii) Permohonan daripada mereka yang tidak layak.

Sekiranya mangsa yang masih belum mendapat bantuan, ini berkemungkinan kerana mereka tidak layak.

Setakat ini, berdasarkan rekod NADMA, seramai 6,340 KIR yang terjejas akibat banjir dan layak menerima BWI. Dari jumlah tersebut seramai 4,406 KIR telah menerima BWI bagi daerah Melaka Tengah. Proses pengagihan BWI kepada mangsa yang layak masih giat dijalankan dengan kerjasama erat antara NADMA, Kerajaan Negeri dan Unit Penyelarasan Pelaksanaan (ICU). Pengesahan mereka yang layak menerima bantuan adalah di bawah tanggungjawab Pegawai Daerah yang berkenaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN YUSUF BIN ABD. WAHAB [TANJONG
MANIS]**

TARIKH : 22 MAC 2022 (SELASA)

SOALAN

TUAN YUSUF BIN ABD. WAHAB [TANJONG MANIS] minta **MENTERI
ALAM SEKITAR DAN AIR** menyatakan adakah langkah-langkah yang
dilakukan untuk menghalang hakisan pantai di Kampung Belawai dan
mengancam bangunan dan aktiviti pelancongan di kawasan tersebut.

JAWAPAN

Tuan Yang Di-Pertua,

1. KASA mengambil perhatian serius terhadap masalah hakisan pantai di Kampung Belawai, Tanjung Manis, Mukah. Sehubungan itu, pihak kementerian dalam proses memohon peruntukan di bawah *Rolling Plan* 3 (RP3), RMKe-12 untuk Projek Pengawalan Hakisan Pantai Di Pantai Kuala Belawai, Daerah Tanjung Manis, Mukah bagi mengatasi masalah hakisan tersebut dengan anggaran kos berjumlah RM 20 juta yang merangkumi skop kerja seperti berikut:

1. Kerja-Kerja Ukur
2. Kerja-Kerja Penyiasatan Tanah
3. Perkhidmatan Perunding (Kerja-Kerja Rekabentuk dan Penyeliaan Tapak)
4. Pengambilan Balik Tanah
5. Pembinaan Struktur Lapis Lindung Batu sepanjang 2 km
6. Pengurusan projek

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 22 MAC 2022 (SELASA)

SOALAN :

PUAN HAJAH NATRAH BINTI ISMAIL [SEKIJANG] minta **PERDANA MENTERI** menyatakan langkah-langkah yang akan diambil untuk melindungi pemberi maklumat dalam memberikan maklumat-maklumat penting mengenai pelbagai salah laku agensi-agensi Kerajaan dan bukan Kerajaan.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, perlindungan kepada pemberi maklumat diperuntukkan di bawah Akta Perlindungan Pemberi Maklumat 2010 [Akta 711]. Akta ini telah mula berkuat kuasa pada 15 Disember 2010 dan terpakai ke seluruh negara. Akta 711 ini digubal bagi memperuntukkan perlindungan terhadap pemberi maklumat yang mendedahkan sesuatu kelakuan tidak wajar. Pendedahan kelakuan tidak wajar adalah merujuk kepada apa-apa kelakuan yang jika terbukti, menjadi suatu kesalahan tatatertib atau kesalahan jenayah.

Untuk mendapatkan perlindungan di bawah Akta 711, *whistleblower* atau pemberi maklumat hendaklah memenuhi syarat berikut :

Pertama, seseorang pemberi maklumat mestilah melapor agensi penguat kuasa yang berkaitan mengenai salah laku tersebut. “Agensi penguatkuasa” adalah merujuk kepada agensi yang ditubuhkan oleh Kerajaan Persekutuan atau Negeri yang diberi kuasa penyiasatan dan penguatkuasaan di bawah undang-undang bertulis; dan

Kedua, maklumat yang didedahkan kepada agensi penguatkuasa tidak boleh didedahkan kepada pihak lain melalui apa cara sekalipun bagi mengelakkan identiti pemberi maklumat diketahui oleh pihak lain dan perlindungan dapat diberikan kepada pemberi maklumat tersebut.

Namun, perlindungan yang diberikan di bawah Akta ini boleh dibatalkan menurut peruntukan seksyen 11 Akta berkenaan.

Oleh itu, sekiranya tindakan oleh pemberi maklumat yang melapor kes berkaitan salah laku mana-mana pihak adalah mematuhi dan mengikut tatacara yang telah diperuntukkan di bawah Akta 711 seperti yang telah dinyatakan, maka pemberi maklumat berkenaan boleh dilindungi di bawah Akta 711 melalui agensi penguat kuasa yang berkaitan.

Kajian sedang dijalankan untuk menambahbaik Akta ini selaras dengan inisiatif di bawah Pelan Antirasuah Nasional (NACP) bagi tahun 2019-2023.

Sekian, terima kasih.

PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA PENGGAL KELIMA
PARLIMEN KEEMPAT BELAS TAHUN 2022

PERTANYAAN : LISAN

DARIPADA : DATUK SERI HAJI AHMAD BIN HAJI MASLAN [PONTIAN]

TARIKH : 22 MAC 2022 (SELASA)

SOALAN

DATUK SERI HAJI AHMAD BIN HAJI MASLAN [PONTIAN] minta **MENTERI PERUSAHAAN PERLADANGAN DAN KOMODITI** menyatakan usaha untuk mengawal harga input pertanian sawit seperti baja dan racun daripada naik mendadak dan mengatasi kekurangan buruh ladang. Apakah langkah-langkah untuk memastikan harga sawit akan terus tinggi pada masa akan datang.

JAWAPAN:

Tuan Yang Di-Pertua,

Untuk makluman, kawalan harga baja dan racun adalah di bawah bidang kuasa Kementerian Pertanian dan Industri Makanan. Walaubagaimanapun, berhubung perkara berkenaan langkah-langkah dalam memastikan harga sawit akan sentiasa kekal dalam nilai yang tinggi, Kementerian ingin menekankan bahawa harga pasaran minyak sawit mentah yang tinggi pada hari ini adalah akibat faktor sosio ekonomi dunia yang melalui pelbagai perubahan yang secara langsung telah memberi nilai tambah kepada harga sawit di Malaysia.

Harga purata minyak sawit mentah (MSM) telah meningkat sebanyak 64.1% kepada RM4,407.00 satu tan pada 2021 berbanding hanya

RM2,685.50 satu tan pada 2020. Harga purata bulanan MSM tertinggi dalam sejarah industri sawit negara telah direkodkan pada RM5,354.50 satu tan yang telah dicapai pada bulan Januari 2022. Manakala harga purata harian MSM tertinggi pula dalam sejarah industri sawit negara telah direkodkan pada RM6,158.00 satu tan yang telah dicapai pada 21 Februari 2022.

Namun begitu, penganalisa pasaran mengunjurkan harga MSM akan kembali stabil pada paras RM3,500 – RM4,500 satu tan pada tahun 2022. Harga MSM yang tinggi kini adalah disebabkan oleh gangguan yang berlaku terhadap bekalan minyak sayuran dunia seperti minyak kacang soya dan minyak sawit. Pengeluaran minyak sayuran dunia pada tahun 2022 diunjurkan kembali mencatatkan pertumbuhan yang positif dan harganya akan kembali stabil dipasaran.

Bagi memastikan harga MSM kekal stabil di masa hadapan, Kementerian telah mengambil langkah-langkah strategik terbaru seperti berikut:

- i. Meneruskan program penanaman semula sawit yang telah dicadangkan di bawah bajet 2022 dengan peruntukan sebanyak RM10 juta. Langkah ini diambil bagi memastikan industri sawit terus kekal kompetitif di masa hadapan di samping dapat memastikan paras stok minyak sawit agar kekal terurus rendah bagi memastikan harga MSM kekal stabil di masa hadapan;
- ii. Melancarkan kontrak niaga hadapan MSM khusus untuk Malaysia Timur melalui kerjasama dengan Bursa Malaysia yang dikenali sebagai *East Malaysia Crude Palm Oil Futures* (FEPO) atau Kontrak Niaga Hadapan Minyak Sawit Malaysia Timur. Ini dijangka dapat mewujudkan mekanisma harga MSM yang lebih baik;
- iii. Meningkatkan permintaan terhadap minyak sawit dan produk berasaskan sawit melalui pengukuhan pasaran sedia ada seperti di Pakistan, Turki, negara-negara ASEAN dan sebagainya dan penerokaan pasaran baharu seperti ke Benua Afrika, negara Timur Tengah dan Benua Amerika;

- iv. Memperkukuh kerjasama strategik bersama Indonesia menerusi Majlis Negara-Negara Pengeluar Minyak Sawit (*Council of Palm Oil Producing Countries* atau CPOPC) bagi memantapkan lagi amalan persekitaran mampan, pengurusan bekalan, aktiviti promosi dan pembangunan pekebun-pekebun kecil. Selain itu, kerjasama ini membolehkan perancangan dan pelaksanaan pelbagai aktiviti untuk memperkukuhkan harga; dan
- v. Pelaksanaan secara mandatori Skim Pensijilan Minyak Sawit Mampan Malaysia (MSPO). Pensijilan ini memberi penekanan dalam mempraktikkan amalan pertanian baik (GAP), penjagaan keselamatan dan kesihatan pekerja, pematuhan undang-undang serta melindungi alam sekitar. Ia bagi memastikan minyak sawit terus berdaya saing dari segi tahap kualiti dan kelestarian dengan minyak sayuran lain dunia.

Bagi mengatasi masalah kekurangan pekerja di ladang, kerajaan telah menggalakkan pengusaha-pengusaha ladang untuk meningkatkan tahap penggunaan mekanisasi terutamanya untuk aktiviti penuaian dan pemungutan buah tandan segar (BTS).

Bagi mempercepatkan teknologi mekanisasi dan automasi, kerajaan telah menubuhkan Konsortium Penyelidikan Mekanisasi dan Automasi Sawit (MARCOP). Sebanyak RM30 juta daripada kutipan ses akan digunakan sebagai pelengkap oleh industri kepada peruntukan RM30 juta yang disediakan kerajaan melalui geran padanan seperti diumumkan semasa Belanjawan 2021. Selain itu, pihak kementerian juga mempunyai perancangan untuk *revamp* cara-cara penanaman pokok sawit di ladang secara tersusun supaya jentera-jentera automasi dan mekanisasi dapat digunakan dengan lebih efisien.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN CHA KEE CHIN [RASAH]

TARIKH : 22 MAC 2022 (SELASA)

SOALAN

TUAN CHA KEE CHIN [RASAH] minta **MENTERI ALAM SEKITAR DAN AIR** menyatakan bilakah rancangan tebatan banjir (RTB) Sungai Linggi (fasa 5), Sungai Batang Labu dan Sungai Jijan akan dilaksanakan dan berapa peruntukan yang terbabit untuk setiap sungai ini. Limpahan air sungai dan kerosakan tebing di beberapa bahagian sungai-sungai ini telah mengakibatkan banjir pada 18 Disember 2021 dan usaha segera hendaklah dilakukan untuk mengelakkan musibah ini berulang.

JAWAPAN

Tuan Yang Di-Pertua,

1. Untuk makluman YB, KASA melalui JPS telah pun mengambil inisiatif bagi mengurangkan impak bagi Sungai Linggi, Sungai Batang Labu dan Sungai Jijan. Antara langkah penyelesaian yang diambil oleh JPS bagi mengurangkan impak risiko banjir melalui Tindakan Jangka Pendek secara melibatkan kerja-kerja sepertimana berikut:

- a. Kerja-kerja Pemuliharaan Sungai Batang Labu yang dianggarkan berjumlah RM 300,000.00
- b. Kerja-kerja Membina Penahan Tebing Sungai Jijan di Kampung Jijan yang dianggarkan berjumlah RM 150,000.00

- c. Kerja-kerja Pembaikan Tebing Sungai dan Pengukuhan Ban Sungai Linggi Di Kg.Batu 3, Mambau yang dianggarkan berjumlah RM 400,000.00.

2. Ini adalah sebagai langkah **Quick Win/penyelesaian jangka pendek dan sederhana**. Sejumlah peruntukan melalui Pemuliharaan Sungai Bagi Mengurangkan Risiko Banjir (Peruntukan Persekutuan) dan Pengurusan Sungai (Peruntukan Kerajaan Negeri) akan digunakan bagi melaksanakan kerja-kerja di sungai-sungai berkenaan.

3. Tindakan Jangka Sederhana pula melibatkan kerja-kerja penyelenggaraan dan pemuliharaan sungai tanpa melibatkan kos atau peruntukan Kerajaan Negeri Sembilan Darul Khusus dengan kaedah timbal balik hasil daripada mengeluarkan, mengalihkan dan mengangkut bahan batuan akan dilaksanakan di jajaran Sungai Linggi turut dalam perancangan pelaksanaan dalam masa terdekat.

4. Permohonan berkenaan Projek Pembangunan Lembangan Sungai Bersepadu bagi **Sungai Linggi (Fasa 5)** dan Pembangunan Lembangan Sungai Bersepadu **Sungai Batang Labu** sedang dipohon di bawah pelaksanaan Rolling Plan Ke-3, Rancangan Malaysia Ke-12. Tempoh jangkaan pelaksanaan fasa perancangan yang melibatkan kajian dan rekabentuk perunding sehinggalah ke fasa pembinaan bagi projek ini adalah selama 4 tahun.

5. Manakala pelaksanaan kajian dan rekabentuk bagi Projek Rancangan Tebatan Banjir **Sungai Jijan** sedang dalam pelaksanaan di bawah peruntukan Kerajaan Negeri Sembilan. Kemajuan terkini adalah di dalam Fasa *Conceptual Design Report*. Pelaksanaan peringkat Rekabentuk oleh perunding dijadualkan akan selesai pada Ogos 2022. Pelaksanaan pembinaannya kelak adalah termaktub kepada peruntukan yang akan diluluskan oleh Kerajaan Negeri Sembilan dan sekiranya berkeperluan akan dibawa kepada pertimbangan peringkat Kerajaan Persekutuan melalui Rolling Plan – RMK selanjutnya.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. MUJAHID BIN YUSOF
RAWA [PARIT BUNTAR]**

TARIKH : 22 MAC 2021 (SELASA)

SOALAN :

Minta **PERDANA MENTERI** menyatakan jumlah pelajar Sekolah Kebangsaan yang tidak mengikuti pengajian Kelas Agama dan Fardu Ain (KAFA) di seluruh negara dan apakah usaha Kerajaan memastikan pelajar ini mengikuti pengajian Kelas Agama dan Fardu Ain (KAFA).

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

1. Untuk makluman Ahli Yang Berhormat, murid-murid di Sekolah Kebangsaan mengikuti Program KAFA di premis yang pelbagai. Selain Program KAFA yang dilaksanakan di Sekolah Kebangsaan, murid-murid turut mengikuti Program KAFA yang dijalankan di masjid, surau, balai raya dan sebagainya. Sehingga kini anggaran peratusan murid beragama Islam di Sekolah Kebangsaan yang tidak mengikuti program KAFA adalah sekitar 36.4%.
2. Berdasarkan maklumat daripada negeri-negeri, selain mengikuti pendidikan peringkat rendah di Sekolah Kebangsaan, terdapat murid-murid yang mengikuti pendidikan peringkat rendah di sekolah rendah agama di bawah kelolaan Pihak Berkuasa Agama Negeri, swasta dan persendirian.
3. Sebagai program yang berkonsepkan pengukuhan asas Pendidikan Islam bagi kanak-kanak berumur dari 7 tahun hingga 12 tahun, sehingga kini tidak ada satu dasar yang mewajibkan murid-murid beragama Islam mengikuti Program KAFA. Namun demikian, JAKIM bersama Agensi Pelaksana KAFA Negeri sentiasa menggalakkan ibu bapa atau penjaga untuk menghantar anak-anak mereka mengikuti KAFA dalam membentuk kemenjadian murid yang cemerlang di dunia dan akhirat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

DARIPADA : DATO' SRI HASAN BIN ARIFIN [ROMPIN]

TARIKH : 22 MAC 2022 (SELASA)

SOALAN

DATO' SRI HASAN BIN ARIFIN [ROMPIN] minta **MENTERI ALAM SEKITAR DAN AIR** menyatakan sejauh manakah keberkesanan perkhidmatan sistem amaran bencana oleh Jabatan Meteorologi Malaysia dan adakah Kementerian mempunyai cadangan untuk membangunkan satu aplikasi atau sistem khas berkaitan amaran bencana yang berfungsi memberikan amaran secara automatik dan segera ke peranti atau telefon pintar rakyat.

JAWAPAN

Tuan Yang Di-Pertua,

1. Untuk makluman Ahli Yang Berhormat, Jabatan Meteorologi Malaysia (MET Malaysia) merupakan agensi di bawah Kementerian Alam Sekitar Dan Air (KASA) yang dipertanggungjawabkan untuk mengeluarkan ramalan dan amaran cuaca di negara ini termasuklah amaran bencana seperti cuaca kering atau *dry spell* dan bencana geofizikal seperti gempa bumi dan tsunami.
2. Bagi meningkatkan keupayaan ramalan cuaca, MET Malaysia mengguna pakai Model Ramalan Cuaca Numerikal dengan adaptasi teknologi Sistem Komputer Berprestasi Tinggi (*High Performance Computing* – HPC). Sistem tersebut dapat menjangka risiko bencana cuaca sekurang-kurangnya 7 hari lebih awal. Di samping itu, MET Malaysia juga mempunyai sistem pemantauan dan ramalan fenomena ribut petir dan hujan lebat iaitu *Radar Integrated Nowcasting System* (RaINS) bagi menghasilkan unjuran pergerakan dan intensiti hujan setiap 10 minit sehingga tiga jam ke hadapan.
3. Maklumat dan amaran cuaca tersebut disampaikan kepada orang awam menerusi pelbagai platform iaitu siaran di stesen Radio Televisyen Malaysia (RTM), mesej pesanan ringkas (SMS), laman sesawang dan media sosial seperti Facebook, Instagram dan Twitter. Maklumat dan amaran cuaca juga disalurkan kepada Agensi Pengurusan Bencana Negara (NADMA) selaku agensi peneraju pengurusan dan kesiapsiagaan bencana negara.
4. Kementerian menerusi MET Malaysia telah membangunkan aplikasi mudah alih myCuaca. Orang ramai boleh mendapat maklumat cuaca dan bencana secara terus pada setiap masa menerusi aplikasi tersebut. Statistik pada tahun 2021 menunjukkan pengguna yang menggunakan aplikasi ini ialah seramai 350 ribu orang.
5. Kementerian sentiasa menambah baik aspek penyampaian perkhidmatan cuaca dan bercadang untuk menggunakan *Technology Cloud Services* untuk aplikasi myCuaca yang sedang dimohon di bawah Rancangan Malaysia Kedua Belas (RMKe-12). Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : TUAN LIM LIP ENG [KEPONG]

TARIKH : 22 MAC 2022 (SELASA)

SOALAN

TUAN LIM LIP ENG [KEPONG] minta **PERDANA MENTERI** menyatakan berapa agensi penguatkuasa yang terlibat termasuk Suruhanjaya Sekuriti yang telah atau sedang menyiasat Ketua Pesuruhjaya Suruhanjaya Pencegahan Rasuah Malaysia Tan Sri Azam Baki berhubung pemilikan saham menerusi akaun dagangannya. Apakah status terkini siasatan-siasatan tersebut.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, isu saham yang di pertikaikan oleh banyak pihak daripada parti pembangkang sebenarnya telahpun selesai. Selain daripada itu, isu ini juga telah diputuskan dan tiada kes oleh inkuiri pihak Suruhanjaya Sekuriti Malaysia (SC). Malahan, Ketua Pesuruhjaya Suruhanjaya Pencegahan Rasuah Malaysia (KPSPRM) telah pun melalui beberapa Jawatankuasa iaitu:

- i. Lembaga Penasihat Pencegahan Rasuah (LPPR),
- ii. Jawatankuasa Mencegah Rasuah Parlimen (JKMR); dan
- iii. Jawatankuasa Aduan (JKA).

2. Menerusi satu kenyataan SC pada 18 Januari 2022, suruhanjaya itu yang selesai menjalankan siasatan menjelaskan bahawa telah menyelesaikan siasatan berdasarkan bukti yang dikumpul dan SC tidak dapat memastikan secara muktamad jika terdapat pelanggaran di bawah Seksyen 25(4) Akta Perindustrian Sekuriti (Depositori Pusat) (SICDA) telah berlaku.
3. Oleh yg demikian, tiada keperluan lagi isu pemilikan saham oleh KPSPRM ini dipertikaikan. KPSPRM juga telah mengambil tindakan undang-undang terhadap pihak yang memfitnah beliau dan kes sedang dalam peringkat mahkamah dan sebarang ulasan kes ini juga akan menimbulkan *sub judice*.
4. Kerajaan tidak melindungi individu-individu tertentu atau mengambil tindakan terhadap orang-orang yang tertentu hanya kerana untuk memuaskan hati sesetengah pihak. Sesiapa sahaja bertanggungjawab akan dihadapkan ke muka pengadilan dan mahkamahlah yang akan menentukan sama ada orang itu bersalah atau tidak.
5. Sehubungan itu, semua pihak perlu menerima keputusan SC yang menjelaskan tidak ada kes terhadap KPSPRM berhubung akaun dagangan miliknya dan keputusan hasil siasatan SC perlu menjadi panduan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN
DARIPADA : YB DATO' SRI AZALINA OTHMAN SAID
(PENGERANG)
TARIKH : 22 MAC 2022 (SELASA)

SOALAN

YB DATO' SRI AZALINA OTHMAN SAID (PENGERANG) minta **MENTERI LUAR NEGERI** menyatakan rancangan dan jangka masa Kementerian untuk menandatangani baki 6 perjanjian teras hak asasi manusia antarabangsa memandangkan Malaysia menduduki kerusi Majlis Hak Asasi Manusia PBB.

JAWAPAN

Tuan Yang di-Pertua,

Terdahulu saya ingin mengucapkan setinggi-tinggi penghargaan kepada Yang Berhormat Pengerang di atas keprihatinan terhadap isu berhubung penyertaan Malaysia ke instrumen antarabangsa dalam soalan yang telah dikemukakan.

Tuan Yang di-Pertua,

2. Untuk makluman Yang Berhormat, baki 6 perjanjian teras hak asasi manusia antarabangsa yang masih belum dianggotai oleh Malaysia adalah di bawah bidang tugas Kementerian yang bertanggungjawab mengenai isu yang disentuh dalam instrumen tersebut. Jawapan yang akan saya berikan adalah tertumpu kepada pendekatan secara umum yang diambil oleh Kerajaan dalam membuat pertimbangan menganggotai setiap instrumen yang ada. Bagi mendapatkan perancangan terperinci Kerajaan mengenai instrumen yang dimaksudkan, ia perlu diajukan kepada Kementerian yang berkenaan.

Tuan Yang di-Pertua,

3. Sebelum Malaysia bersetuju untuk meratifikasi sebarang instrumen, pihak Kerajaan perlu membuat penilaian serta pertimbangan secara terperinci. Pihak kerajaan sentiasa bersifat terbuka dan bersedia untuk meratifikasi sebarang instrumen, sama ada yang mengikat dari perspektif perundangan (*legally binding*) atau tidak mengikat (*non-legally binding*); selagi ia menyumbang ke arah kesepakatan negara dengan undang-undang antarabangsa.

4. Kementerian Luar Negeri selaku Kementerian yang bertanggungjawab mengendalikan isu berkaitan hubungan luar akan berfungsi sebagai perantara antara Kerajaan Malaysia dengan badan yang mengelola instrumen tersebut mengenai keputusan Kerajaan Malaysia untuk menyertai dan meratifikasi instrumen berkenaan.

5. Pendekatan yang sama turut diambil bagi instrumen yang berada di bawah bidang kuasa Kementerian Luar Negeri iaitu Statut Rom. Seperti yang telah dinyatakan sebelum ini mengenai soalan penyertaan semula Malaysia ke Statut Rom, Kerajaan akan terus mengkaji perkara ini secara menyeluruh, termasuk melalui perbincangan berterusan dengan semua pemegang taruh, sebelum sebarang keputusan dibuat.

6. Di sini saya ingin tekankan bahawa pihak Kerajaan akan sentiasa prihatin dengan mendengar, menghormati dan tidak membelakangkan pandangan rakyat dan pemegang taruh yang lain dalam hal menyertai dan meratifikasi sebarang instrumen antarabangsa. Pendekatan yang teliti dan menyeluruh sebegini adalah penting bagi memastikan peruntukan-peruntukan di bawah instrumen antarabangsa tersebut adalah selaras dan tidak bercanggah dengan undang-undang domestik sedia ada.

7. Bagi memastikan proses libat urus memberi impak yang lebih, Kementerian Luar Negeri telah bekerjasama dengan Pejabat Pesuruhjaya Tinggi PBB bagi Hak Asasi Manusia (OHCHR) untuk menterjemahkan 9 instrumen teras hak asasi manusia dan Statut Rom ke dalam Bahasa Malaysia. Usaha ini bertujuan untuk meningkatkan kesedaran rakyat dan semua pihak yang berkepentingan dengan memberi pemahaman yang tepat mengenai obligasi dan tanggungjawab negara serta implikasi perjanjian-perjanjian tersebut sekiranya Malaysia menyertai dan meratifikasi setiap triti yang dikenal pasti. Inisiatif tersebut juga merupakan komitmen yang telah diberikan oleh Malaysia semasa proses melobi keanggotaan ke MHAM bagi penggal 2022–2024.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

DARIPADA : TENGKU ZULPURI BIN RAJA PUJI [RAUB]

TARIKH : 22 MAC 2022 (SELASA)

SOALAN

TENGKU ZULPURI BIN RAJA PUJI [RAUB] minta **MENTERI ALAM SEKITAR DAN AIR** menyatakan pada Januari 2021, November 2021 dan Januari 2022, kawasan perkampungan tradisional serta kawasan yang berhampiran dengan sungai-sungai telah dilanda banjir yang besar dan luar biasa. Apakah tindakan segera dan jangka masa panjang JPS bagi mengurangkan kesan kerugian yang dialami mangsa mangsa banjir ini.

JAWAPAN

Tuan Yang Di-Pertua,

1. Untuk makluman YB, antara langkah segera yang diambil oleh JPS bagi mengurangkan impak risiko banjir di kawasan perkampungan yang disebut oleh YB adalah seperti berikut:

- (i) Memperbaiki kerosakan dan memastikan kesiapsiagaan infrastruktur tebatan banjir seperti pam, pintu air, genset, ban dan tebatan banjir;
- (ii) Menyelenggara, mendalamkan dan membersihkan saliran utama, sungai serta kolam takungan banjir bagi meningkatkan kapasiti aliran dan takungan air larian permukaan;
- (iii) Membaiki semua kerosakan hakisan tebing sungai dan hakisan pantai di seluruh negara; dan
- (iv) Menyelenggara stesen-stesen hidrologi di seluruh negara yang mengalami kerosakan.

2. Sementara itu penyelesaian jangka panjang memberi fokus kepada pembangunan struktur dan reka bentuk infrastruktur tebatan banjir berkonsepkan *make room for water* seperti menaik taraf sistem pengurusan banjir, pantai dan sungai-sungai utama serta menaik taraf benteng/ban pantai/ sungai dan parit dengan meningkatkan tahap perlindungan (kala purata ulangan dengan izin *Average Recurrence Interval* [ARI] reka bentuk infrastruktur saliran dan pantai) daripada 100 tahun ARI kepada 200 tahun ARI dengan mengambil kira faktor perubahan iklim.

3. Pada tahun 2022, peruntukan telah di salurkan ke negeri Pahang bagi melaksanakan kerja-kerja penyelenggaraan seperti berikut:-

- i. Kerja-kerja pemuliharaan sungai untuk mengurangkan risiko banjir yang berjumlah RM 36 juta yang melibatkan 224 bilangan projek;

SOALAN NO : 21

- ii. Kerja-kerja kecemasan luar jangka (sebelum dan selepas banjir) berjumlah RM6.145 juta yang melibatkan 42 bilangan projek;
 - iii. Kerja-kerja penyelenggaraan kolam takungan banjir berjumlah RM 2 juta melibatkan 13 buah kolam takungan.
4. Manakala perancangan jangka masa pendek mitigasi banjir di daerah Raub pula, KASA telah menyalurkan peruntukan yang berjumlah RM 2.3 juta bagi tahun 2022 yang melibatkan;-
- i. Kerja-kerja pemuliharaan sungai untuk mengurangkan risiko banjir yang berjumlah RM 1.98 juta yang melibatkan 16 bilangan projek di peringkat pelaksanaan
 - ii. Kerja-kerja penyelenggaraan kolam takungan banjir berjumlah RM 332,000.00 melibatkan 7 buah kolam takungan.
5. Bagi perancangan jangka masa panjang, projek RTB Sungai Dong, Raub, Pahang Darul Makmur yang dianggarkan RM 145 juta akan dimohon pada Rolling Plan ke-3 (RP3) tahun 2023 dalam RMKe-12.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : TUAN CHE ALIAS BIN HAMID
[KEMAMAN]**

TARIKH : 22 MAC 2022 (SELASA)

SOALAN:

Minta **PERDANA MENTERI** menyatakan pendirian Kerajaan mengenai cadangan untuk mewujudkan suatu mekanisme penyiasatan nilai harta penjawat awam yang mencurigakan bagi membanteras rasuah dan penyelewengan dalam sektor awam.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Untuk makluman Ahli Yang Berhormat, mekanisme penyiasatan mengenai nilai harta penjawat awam yang mencurigakan telah digariskan dalam Peraturan-Peraturan Pegawai Awam (Kelakuan dan Tatatertib) 1993 [P.U. (A) 395/1993]. Sepertimana yang diperuntukkan di bawah Peraturan 11, [P.U.(A) 395/1993] berkenaan, jika Ketua Jabatan berpendapat atau mengesyaki seseorang pegawai;

- (a) menjalani gaya hidup yang mewah melebihi taraf kehidupan yang munasabah berdasarkan emolumen dan pendapatan persendirian yang lain yang sah; atau
- (b) mengawal atau memiliki sumber-sumber kewangan atau harta, sama ada harta alih atau harta tak alih, yang nilainya tidak seimbang dengan emolumennya dan apa-apa pendapatan persendirian yang lain yang sah;

Ketua Jabatan hendaklah mengemukakan notis bertulis kepada pegawai itu bagi mendapatkan penjelasan bertulis dalam tempoh 30 hari daripada tarikh penerimaan notis tentang bagaimana pegawai itu dapat menyelenggara taraf kehidupan mewah sedemikian atau mendapat sumber-sumber kewangannya atau harta itu.

2. Sekiranya tempoh 30 hari telah tamat, sama ada menerima atau tidak menerima penjelasan daripada pegawai itu dalam tempoh yang ditentukan, Ketua Jabatan hendaklah melaporkan perkara tersebut kepada Pihak Berkuasa Tatatertib (PBTT) yang berkenaan.

3. Apabila laporan telah diterima daripada Ketua Jabatan, PBTT yang berkenaan boleh mengambil tindakan tatatertib atau apa-apa tindakan lain terhadap pegawai itu sebagaimana yang difikirkan patut.

4. Manakala Ceraian UP.7.2.6 Pekeliling Perkhidmatan Sumber Manusia (MyPPSM) pula memberi penjelasan dan panduan mengenai pemilikan dan perisytiharan harta oleh pegawai awam dengan lebih terperinci. Semua pegawai dikehendaki mengisytiharkan harta apabila:

- (a) dilantik ke dalam perkhidmatan awam;
- (b) dikehendaki oleh Kerajaan;
- (c) memperolehi harta tambahan; dan
- (d) melupuskan harta.

5. Semua pegawai dikehendaki membuat perisytiharan harta sekurang-kurangnya sekali dalam tempoh lima (5) tahun. Peraturan berkenaan perisytiharan harta ini adalah terpakai kepada semua pegawai awam.

6. Mekanisme pemantauan ke atas perisytiharan harta ini dilaksanakan secara berkala dan dilaporkan dalam Mesyuarat Jawatankuasa Pemandu HRMIS yang di Pengerusikan oleh Ketua Pengarah Perkhidmatan Awam Malaysia sebagai salah satu KPI yang perlu dicapai oleh Kementerian/Agensi. Keahlian mesyuarat ini meliputi Ketua-Ketua Setiausaha Kementerian, Ketua-Ketua Pengarah agensi dan Setiausaha-Setiausaha Kerajaan Negeri.

7. Bagi kes-kes rasuah dan penyelewengan, Suruhanjaya Pencegahan Rasuah Malaysia (SPRM) diberi kuasa mengikut Akta SPRM 2009 untuk mengesan dan menyiasat apa-apa kesalahan yang disyaki membabitkan mana-mana pegawai awam tanpa mengira pangkat dan jawatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN SIM TZE TZIN [BAYAN BARU]

TARIKH : 22 MAC 2022 (SELASA)

SOALAN

TUAN SIM TZE TZIN [BAYAN BARU] minta **PERDANA MENTERI** menyatakan sama ada Kerajaan masih komited dengan dasar pengisytiharan dan pemaparan harta oleh anggota pentadbiran. Mengapa Menteri-Menteri Kerajaan Terkini tidak mengisytiharkan harta dan memaparkan butiran seperti semasa Kerajaan Pakatan Harapan.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, Kerajaan sememangnya komited dengan dasar pengisytiharan harta dengan memperkukuhkan akauntabiliti dan integriti Ahli Parlimen melalui dasar pengisytiharan harta. Paparan perisytiharan harta anggota pentadbiran boleh di akses secara atas talian di **Portal Perisytiharan Harta**.

Berdasarkan Kod Etika Bagi Anggota Pentadbiran Dan Ahli Parlimen, paparan butiran perisytiharan harta akan dipaparkan di portal, selama tempoh 3 bulan dari tarikh penerimaan dokumen perisytiharan harta oleh SPRM. Butiran perisytiharan harta yang dipaparkan terdiri daripada jumlah pendapatan bulanan dan jumlah aset.

SPRM adalah merupakan *platform* untuk pemaparan harta melalui portal dan bukan menjadi tanggungjawab SPRM untuk memaksa mana-mana pihak untuk mengisytiharkan harta mereka. SPRM hanya diberikan mandat oleh Kabinet untuk menentukan masa dan kaedah pemaparan perisytiharan harta sahaja.

Walau bagaimanapun, Ahli Parlimen yang gagal mengisytiharkan harta akan dirujuk kepada Jawatankuasa Hak dan Kebebasan Parlimen mengikut Peraturan Mesyuarat 80 Peraturan-peraturan Majlis Mesyuarat Dewan Rakyat kerana melanggar hak dan keistimewaan majlis.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB PUAN RUBIAH BINTI WANG (KOTA
SAMARAHAN)**

TARIKH : 22 MAC 2022 (SELASA)

SOALAN

PUAN RUBIAH BINTI WANG [KOTA SAMARAHAN] minta **MENTERI
KANAN KERJA RAYA** menyatakan:

(a) status terkini projek pembesaran dan menaik taraf laluan 8101 Jalan Dato Mohd Musa; dan

(b) status cadangan lain untuk mengatasi kesesakan lalu lintas di Kota Samarahan termasuk pembinaan flyover di bulatan-bulatan utama Samarahan Expressway.

JAWAPAN

Tuan Yang Di-Pertua,

(a) Untuk makluman Ahli Yang Berhormat, jalan-jalan utama di Kota Samarahan terdiri daripada Jalan Persekutuan dan juga jalan-jalan lain iaitu Jalan Negeri dan Jalan Perbandaran. Bagi Jalan Persekutuan di bawah bidang kuasa Kementerian Kerja Raya (KKR), KKR telah mengambil inisiatif dengan menaiktaraf laluan Persekutuan 8101, Jalan Datuk Musa dari KM8 ke Bulatan G3, Kota Samarahan yang telah diluluskan dalam Rolling Plan 3 (RP3), Rancangan Malaysia Ke-11 (RMKe-11). Projek naiktaraf tersebut telah bermula pada 16 April 2020 dan dijadualkan siap pada 9 Jun 2023. Kemajuan fizikal sehingga Januari 2022 adalah 46.32% (sebenar) berbanding 44.79% (jadual)

(b) Berhubung dengan cadangan pembinaan flyover di bulatan-bulatan utama Samarahan Expressway (Q112B), untuk makluman Ahli Yang Berhormat, laluan tersebut adalah berstatus jalan Negeri. Oleh demikian, sebarang pembangunan di atas jalan Negeri adalah terletak di bawah bidang kuasa dan kelulusan Kerajaan Negeri tersebut. Walau bagaimanapun, sekiranya cadangan pembinaan flyover ini ingin dilaksanakan dengan menggunakan peruntukan persekutuan setelah mengambil kira keperluan teknikal yang telah dipenuhi, adalah dicadangkan supaya jalan tersebut diwartakan kepada jalan persekutuan terlebih dahulu sebelum dipertimbangkan untuk diangkat dalam Rolling Plan (RP) yang akan datang tertakluk kepada persetujuan Kerajaan Negeri Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : YB TUAN CHA KEE CHIN (RASAH)

TARIKH : 22 MAC 2022 (SELASA)

SOALAN

TUAN CHA KEE CHIN [RASAH] minta **MENTERI KANAN KERJA RAYA** menyatakan bilakah projek menaik taraf Jalan Labu (dari satu ke dua lorong di setiap arah), untuk bahagian jalan yang menghubungkan susur jalan dari Tol Bandar Ainsdale ke Lingkaran Tengah Seremban (MRR) akan dilaksanakan, memandangkan JKR telah menolak permohonannya sebelum ini dan apakah alasan kepada penolakan ini.

JAWAPAN

Tuan Yang Di-Pertua,

Untuk makluman Ahli Yang Berhormat, Projek Menaiktaraf Jalan Susur (FT362) Dari Tol Bandar Ainsdale ke Jalan Lingkaran Tengah Seremban, Daerah Seremban, Negeri Sembilan telah dimohon pada Rolling Plan 1, Rancangan Malaysia Ke-12 (RP1, RMKe-12). Walau bagaimanapun, berdasarkan agihan siling peruntukan yang terhad dan keutamaan projek, cadangan projek tersebut tidak dapat diangkat kepada Agensi Pusat dalam tempoh berkenaan.

Untuk makluman Ahli Yang Berhormat juga, Kementerian ini tidak menerima permohonan projek tersebut pada Rolling Plan 2 dan Rolling Plan 3, RMKe12. Kementerian ini akan meneliti cadangan projek tersebut apabila dimohon dalam Rolling Plan yang akan datang dan akan diangkat untuk pertimbangan Agensi Pusat sekiranya memenuhi aspek teknikal untuk dilaksanakan, tertakluk kepada keutamaan Kerajaan Negeri serta ketersediaan agihan peruntukan pembangunan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN MA'MUN BIN SULAIMAN
(KALABAKAN)**

TARIKH : 22 MAC 2022 (SELASA)

SOALAN

TUAN MA'MUN BIN SULAIMAN [KALABAKAN] minta **MENTERI KANAN KERJA RAYA** menyatakan kesediaan untuk mengusahakan pengembalian kelulusan peruntukan pembinaan Kompleks Kuarantin Imigresen Kastam dan Keselamatan (CIQS) Trans Borneo Highway dan Kuarters Kakitangan Kerajaan bernilai RM600 juta di Serudung Kalabakan yang pernah diluluskan oleh Kerajaan terdahulu dalam pembentangan Bajet Negara 2020 demi menaikkan aktiviti ekonomi masyarakat Kalabakan dan Tawau khususnya dan Sabah amnya.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian ini mengambil maklum dan sedang menyusun strategi pembangunan rangkaian jalan raya terkini susulan pengesahan perpindahan ibu negara Indonesia ke Nusantara. Salah satu daripada projek yang dikenal pasti adalah Projek Lebuhraya Trans Borneo jajaran Kalabakan-Serudung yang merupakan sebahagian daripada jajaran Lebu Raya Trans Borneo.

Untuk makluman Ahli Yang terhormat, projek ini pernah diluluskan oleh Kementerian Kewangan di bawah Inisiatif Belanjawan 2020 dan peruntukan sebanyak RM10 juta telah diluluskan di bawah inisiatif ini bagi melaksanakan kajian kerja-kerja awalan terlebih dahulu. Walau bagaimanapun, pada Jun 2020 Kementerian Kewangan telah memutuskan untuk tidak meneruskan semua inisiatif Belanjawan 2020 yang telah diumumkan. Lanjutan daripada itu, kerja-kerja awalan ini tidak dapat diteruskan kerana tiada peruntukan disalurkan kepada Kementerian ini.

Untuk makluman Ahli Yang terhormat, Kerajaan juga telah menyatakan komitmen untuk melaksanakan Projek Lebu Raya Trans Borneo melalui Mesyuarat Jemaah Menteri pada 4 Mac 2022. Kementerian ini akan meneliti cadangan projek Lebu Raya Trans Borneo jajaran Kalabakan-Serudung ini apabila dimohon oleh Kerajaan Sabah dan akan dipertimbangkan untuk diangkat kepada Agensi Pusat tertakluk kepada keutamaan projek dan ketersediaan siling peruntukan pembangunan Kementerian ini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN TAN KOK WAI (CHERAS)

TARIKH : 22 MAC 2022 (SELASA)

SOALAN

TUAN TAN KOK WAI [CHERAS] minta **MENTERI LUAR NEGERI** menyatakan berapa ramai calon duta dari Malaysia yang telah ditolak pelantikannya oleh negara penerima untuk setiap tahun dari tahun 2011 sehingga yang terkini dan sebab penolakan untuk setiap kes dan juga negara yang menolak.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Cheras atas pertanyaan yang dikemukakan.

Tuan Yang di-Pertua,

2. Untuk makluman Dewan yang mulia ini, di dalam mengenal pasti dan seterusnya mengangkat cadangan calon Ketua Perwakilan Malaysia, sama ada Duta Besar mahupun Pesuruhjaya Tinggi ke sesebuah negara sahabat, pemilihan calon yang berkaliber dan mempunyai latar belakang yang bersesuaian amatlah penting. Ini memandangkan Ketua Perwakilan yang dilantik memikul tanggungjawab yang besar sebagai wakil rasmi negara, di samping mengetengahkan dan mempertahankan kepentingan Malaysia di negara-negara yang mereka ditauliahkan.

3. Sehubungan itu, Kementerian Luar Negeri ingin menjelaskan bahawa dari tahun 2011 sehingga kini, dan pada tahun-tahun sebelumnya juga, tiada calon Ketua Perwakilan Malaysia yang pernah ditolak oleh negara-negara penerima. Penerimaan oleh negara-negara berkenaan menunjukkan hubungan diplomatik yang baik dengan Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DATUK ZAKARIA BIN MOHD. EDRIS @
TUBAU [LIBARAN]**

TARIKH : 22 MAC 2022 (SELASA)

SOALAN:

Minta **PERDANA MENTERI** menyatakan dalam usaha Kerajaan untuk memahami denyut permasalahan dan pandangan rakyat dan mendapat maklumat mengenai Aspirasi Keluarga Malaysia, apakah strategi yang dirancang Kerajaan dalam memastikan rakyat di akar umbi mendapat manfaat kepada inisiatif dan program yang telah dilaksanakan.

JAWAPAN:

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Bagi memastikan rakyat di semua peringkat dapat memahami dan menghayati tentang Aspirasi Keluarga Malaysia dengan lebih jelas, satu siri jelajah Negeri akan diadakan ke semua negeri bermula Mac 2022 di Negeri Johor, diikuti dengan negeri-negeri lain dan penutupnya akan diadakan di Putrajaya pada akhir tahun 2022.
2. Jelajah ini akan membawa pengisian yang sama seperti Program 100 Hari Aspirasi Keluarga Malaysia yang telah diadakan pada 9 hingga 12 Disember 2021 di KLCC. Dalam siri jelajah ini, semua perkhidmatan yang berteraskan rakyat akan disediakan bagi memberi ruang dan kemudahan kepada rakyat.
3. Selain itu, program jelajah ini juga diadakan bagi mendapatkan maklum balas rakyat berkaitan Aspirasi Keluarga Malaysia dalam memastikan semua inisiatif Kerajaan sampai ke akar umbi sepertimana termaktub dalam tiga teras utamanya konsep Keluarga Malaysia iaitu keterangkuman, kebersamaan dan kesyukuran.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2021**

PERTANYAAN : LISAN

**DARIPADA : YB TUAN SHAHARIZUKIRNAIN BIN ABD.
KADIR [SETIU]**

TARIKH : 22 MAC 2022 (SELASA)

SOALAN

YB TUAN SHAHARIZUKIRNAIN BIN ABD. KADIR [SETIU] minta **PERDANA MENTERI** menyatakan status terkini pembesaran Jambatan Desa Jaya, Sg. Tong, Setiu serta punca kelewatan pembinaan jambatan tersebut walaupun ianya sudah diluluskan pada penghujung tahun 2019.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Ahli Yang Berhormat, Projek Mengganti Baharu Jambatan FT003/582/70 dan kerja-kerja berkaitan di Kampung Desa Jaya, Daerah Setiu, Terengganu Darul Iman telah diluluskan oleh Kementerian Hal Ehwal Ekonomi (MEA) pada 31 Januari 2020 kepada Perbadanan Memajukan Iktisad Negeri Terengganu (PMINT) di bawah peruntukan Projek-Projek Kecil/ Berimpak Tinggi/ People Centric. Lanjutan daripada itu, PMINT telah memperakukan kos projek berjumlah RM5,300,000.00.

2. Unit Perancang Ekonomi (EPU), Jabatan Perdana Menteri (JPM) melalui surat bertarikh 6 Mei 2020 kepada PMINT telah bersetuju pelaksanaan projek tersebut dengan kos yang diperakukan oleh PMINT. Pada masa yang sama, EPU, JPM mengambil maklum bahawa jambatan tersebut adalah jalan Persekutuan yang terletak di bawah tanggungjawab Jabatan Kerja Raya (JKR).
3. PMINT telah mengadakan sesi libat urus bersama JKR dan Jabatan Pengairan Dan Saliran (JPS) bagi mendapatkan kelulusan pelaksanaan kerja-kerja mengganti baharu jambatan di Desa Jaya, Setiu, Terengganu yang berada di laluan Jalan Persekutuan (FT03) Kuala Terengganu – Kota Bharu. Kementerian Kerja Raya (KKR) memberi kelulusan pelaksanaan tertakluk kepada pematuhan ke atas Arahan Teknik Jalan (ATJ) dan '*Road Safety Audit*' yang ditetapkan oleh Jabatan Kerja Raya (JKR) bagi memastikan kerja – kerja dilaksana mengikut garis panduan dan piawaian.
4. Seterusnya, PMINT bersama perunding yang dilantik oleh PMINT telah membuat semakan semula dan mendapati anggaran kos projek meningkat sebanyak 78.5% atau RM4,159,881.90 iaitu daripada RM5,300,000.00 kepada RM9,459,881.90.
5. PMINT telah memohon kelulusan tambahan kos projek tersebut melalui surat bertarikh 22 Februari 2021.
6. EPU, JPM telah meneliti permohonan PMINT tersebut dan tidak meluluskannya. Sehubungan itu, PMINT disarankan supaya mengemukakan semula permohonan projek melalui Kementerian Kerja Raya (KKR)/JKR pada *Rolling Plan* (RP) akan datang. Keputusan ini adalah mengambil keterangan bahawa jambatan tersebut adalah jalan Persekutuan yang terletak di bawah bidang tanggungjawab JKR.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : PUAN HANNAH YEOH TSEOW SUAN
[SEGAMBUT]**

TARIKH : 22 MAC 2022 (SELASA)

SOALAN

Minta **PERDANA MENTERI** menyatakan jumlah dan butiran perbelanjaan semua Kementerian untuk mempromosikan konsep Keluarga Malaysia termasuk penganjuran 100 Hari Aspirasi Keluarga Malaysia di Kuala Lumpur, pemberian cenderahati Keluarga Malaysia kepada Ahli Dewan Rakyat, iklan, karnival atau majlis.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Jumlah perbelanjaan bagi program 100 Hari Aspirasi Keluarga Malaysia (AKM) yang berlangsung pada 9 hingga 12 Disember 2021 di KLCC adalah sebanyak RM13.696 juta yang meliputi kos pelaksanaan kempen 100 Hari AKM, kos pelaksanaan promosi, publisiti dan tarikan pengunjung, kos bagi keperluan pameran dan Kapsul Keluarga Malaysia, kos persiapan tempat, jurugambar dan juruvideo, keselamatan dan kesejahteraan, kos keurusetiaan dan penginapan, pembayaran yuran pengurusan majlis, kos penyediaan goodies bag kepada pengunjung, perbelanjaan perkhidmatan sepanjang program dan kos-kos tambahan luar jangka.
2. Seramai 106,899 pengunjung telah hadir sepanjang program tersebut berlangsung dan telah menerima pelbagai manfaat daripada perkhidmatan secara langsung yang telah ditawarkan Kerajaan seperti perkhidmatan insolvensi, permohonan skim kredit, kaunseling kewangan, sesi bimbingan dan khidmat nasihat usahawan, pemberian insentif, pameran Jom Masuk IPT Keluarga Malaysia, Karnival Kerjaya Keluarga Malaysia, Diskaun Saman Polis Diraja Malaysia (PDRM) dan Jabatan Pengangkutan Jalan (JPJ) serta banyak lagi.
3. Karnival Kerjaya Keluarga Malaysia telah menawarkan 24,136 pelbagai jawatan daripada 75 majikan. Seramai 3,628 peserta daripada 4,005 orang peserta berdaftar telah dipanggil menghadiri temuduga dan lebih 2,690 orang telah berjaya ke tapisan akhir dalam jawatan yang dipohon setakat ini.

NO. SOALAN: 34

4. Program Jom Masuk IPT Keluarga Malaysia pula telah memberi peluang kepada pengunjung terutamanya lebih 5,000 orang lepasan Sijil Pelajaran Malaysia (SPM) dan Sijil Tinggi Pelajaran Malaysia (STPM), para pelajar dan ibu bapa yang hadir untuk mendapatkan maklumat, mendapatkan tawaran secara langsung untuk memasuki program Asasi, Politeknik, Kolej Komuniti dan Institut Pengajian Tinggi (IPT) di samping menerima bantuan berbentuk komputer riba, bantuan tunai, pelan data dan lain-lain lagi.

5. Sebanyak RM574 ribu jualan usahawan telah direkodkan manakala sebanyak RM11 juta potensi jualan telah berjaya disuai padan melalui sesi *Business Matching* sepanjang program tersebut berlangsung.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK SERI SHAMSUL ISKANDAR @ YUSRE
BIN MOHD AKIN [HANG TUAH JAYA]**

TARIKH : 22 MAC 2022 (SELASA)

SOALAN

DATUK SERI SHAMSUL ISKANDAR @ YUSRE BIN MOHD AKIN [HANG TUAH JAYA] minta **MENTERI ALAM SEKITAR DAN AIR** menyatakan mengenai pembentangan rang undang-undang perubahan iklim kerana ketika ini usaha untuk membangunkan sistem amaran cuaca yang lebih sistematik dan bersepadu amat mustahak berikutan kejadian banjir kilat yang kerap berlaku dan baru-baru ini negara dikejutkan dengan kejadian puting beliung yang mengakibatkan kerosakan harta benda.

JAWAPAN

Tuan Yang Di-Pertua,

1. Untuk makluman Ahli Yang Berhormat, Kementerian Alam Sekitar dan Air (KASA) sedang menggubal Rang Undang-Undang Perubahan Iklim Negara secara berfasa. KASA telah menyiapkan kerangka undang-undang perubahan iklim pada Disember 2021 selaras dengan Aspirasi Keluarga Malaysia. Kerangka undang-undang tersebut mengandungi intipati asas fungsi dan peranan kerangka yang meliputi aspek tadbir urus perubahan iklim negara, mitigasi perubahan iklim, adaptasi perubahan iklim, data dan maklumat mengenai perubahan iklim, pembiayaan

SOALAN NO: 35

perubahan iklim, mekanisme pematuhan, serta pendidikan dan kesedaran awam mengenai perubahan iklim.

2. Fasa seterusnya adalah proses penggubalan Akta Perubahan Iklim negara berdasarkan kerangka undang-undang yang telah dibangunkan pada tahun 2021. Pembangunan Akta Perubahan Iklim ini adalah menggunakan peruntukan Rancangan Malaysia Kedua Belas (RMK-12) dan dijangka akan mengambil masa selama 3 tahun sehingga tahun 2025. Pelbagai proses akan dilaksanakan seperti pembangunan dan perincian kandungan akta, konsultasi bersama pemegang taruh di pelbagai peringkat, proses penilaian impak dan pembentangan rang undang-undang di Parlimen dalam tempoh tersebut.

3. Jabatan Meteorologi Malaysia (MET Malaysia) sebagai agensi di bawah KASA bertanggungjawab untuk mengeluarkan ramalan dan amaran cuaca di negara ini. Teknologi sistem ramalan cuaca yang digunakan oleh MET Malaysia adalah yang terkini, seiring dengan negara-negara maju lain seperti United Kingdom (UK) dan Amerika Syarikat. Sistem ini sentiasa ditambah baik dengan meningkatkan keupayaan rangkaian pencerapan, pemprosesan data dan penyebaran maklumat sedia ada.

4. MET Malaysia juga telah membangunkan aplikasi MyCuaca sebagai salah satu inovasi dalam meningkatkan keberkesanan penyampaian maklumat cuaca dan gempa bumi kepada masyarakat awam. Antara langkah peningkatan keupayaan yang sedang dirancang adalah penggunaan *Technology Cloud Services* untuk aplikasi MyCuaca yang akan dimohon di bawah peruntukan Rancangan Malaysia Kedua Belas (RMKe-12).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : TUAN CHAN FOONG HIN
[KOTA KINABALU]**

TARIKH : 22 MAC 2022 (SELASA)

SOALAN

TUAN CHAN FOONG HIN [KOTA KINABALU] minta **PERDANA MENTERI** menyatakan adakah Suruhanjaya Pilihan Raya Malaysia (SPR) bercadang untuk menambah dan mempelbagaikan kelayakan undi pos bagi Pilihan Raya Umum yang akan datang memandangkan ada pengundi Sabah dan Sarawak di Semenanjung Malaysia yang sukar pulang disebabkan penularan wabak COVID-19 dan kekurangan penerbangan.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Perkara 119 Perlembagaan Persekutuan menetapkan salah satu kelayakan untuk didaftarkan sebagai pemilih ialah bermastautin dalam mana-mana Bahagian Pilihan Raya. Bagi maksud tersebut, Suruhanjaya Pilihan Raya Malaysia (SPR) menentukan Bahagian Pilihan Raya seseorang pemilih berdasarkan kepada alamat pemastautin pemilih seperti di kad pengenalan dan pangkalan data Jabatan Pendaftaran Negara.

Buat masa ini, SPR tidak bercadang untuk memperluaskan kategori undi pos bagi kepada pengundi Sabah dan Sarawak yang tinggal di Semenanjung Malaysia. Kemudahan mengundi secara pos hanya diberikan kepada pengundi dalam kategori seperti berikut:

- i. Ahli SPR dan kakitangan SPR;
- ii. Petugas pilihan raya;
- iii. Tentera, Polis, Polis Pasukan Gerak Am (PGA) yang bertugas pada Hari Mengundi Awal;
- iv. Pengamal media yang bertugas membuat liputan pilihan raya di luar kawasan pada Hari Mengundi;
- v. Kakitangan bagi 9 Agensi (Jabatan Bomba dan Penyelamat Malaysia, Jabatan Penjara Malaysia, Agensi Penguatkuasaan Maritim Malaysia, Sukarelawan Simpanan Polis, Jabatan Imigresen Malaysia, Jabatan Kesihatan Malaysia, Jabatan Pendaftaran Negara-UTC, Angkatan Pertahanan Awam Malaysia, Agensi Pengurusan Bencana Negara) yang bertugas pada Hari Mengundi;
- vi. Pengundi Malaysia yang berada di luar negara; dan
- vii. Pengundi Tidak Hadir (PTH) luar negara iaitu penjawat awam yang berkhidmat di luar negara dan pasangan serta pelajar universiti/institusi tinggi sepenuh masa di luar negara dan pasangan.

SPR menggalakkan pengundi untuk memohon pertukaran Bahagian Pilihan Raya berdasarkan tempat bermastautin terkini bagi memudahkan urusan pengundian bagi suatu pilihan raya.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN KASTHURIRAANI A/P PATTO
(BATU KAWAN)**

TARIKH : 22 MAC 2022 (SELASA)

SOALAN

PUAN KASTHURIRAANI A/P PATTO (BATU KAWAN) minta **MENTERI LUAR NEGERI** menyatakan bilakah Kerajaan Malaysia akan meratifikasi Statut Rom, "*Second Protocol to the International Covenant on Civil and Political Rights*", *United Nations Convention Against Torture* (UNCAT), dan meminda pengecualian kepada *Convention to the Right of Child* (CRC), CEDAW dan konvensyen hak asasi manusia yang lain selaku ahli dalam Majlis Hak Asasi Manusia Pertubuhan Bangsa bangsa Bersatu atau *United Nations Human Rights Council* (UNHRC).

JAWAPAN

Tuan Yang di-Pertua,

Terdahulu saya ingin mengucapkan setinggi-tinggi penghargaan kepada Yang Berhormat Batu Kawan di atas keprihatinan terhadap isu berhubung penyertaan Malaysia ke instrumen antarabangsa dalam soalan-soalan yang telah dikemukakan.

Tuan Yang di-Pertua,

2. Sebelum Malaysia bersetuju untuk meratifikasi sebarang instrumen, pihak Kerajaan perlu membuat penilaian serta pertimbangan secara terperinci. Pihak kerajaan sentiasa bersifat terbuka dan bersedia untuk meratifikasi sebarang instrumen, sama ada yang mengikat dari perspektif perundangan (*legally binding*) atau tidak mengikat (*non-legally binding*); selagi ia menyumbang ke arah kesepakatan negara dengan undang-undang antarabangsa.

3. Kementerian Luar Negeri selaku Kementerian yang bertanggungjawab mengendalikan isu berkaitan hubungan luar akan berfungsi sebagai perantara antara Kerajaan Malaysia dengan badan yang mengelola instrumen tersebut mengenai keputusan Kerajaan Malaysia untuk menyertai dan meratifikasi instrumen berkenaan.

4. Pendekatan yang sama turut diambil bagi instrumen yang berada di bawah bidang kuasa Kementerian Luar Negeri iaitu Statut Rom. Seperti yang telah dinyatakan sebelum ini mengenai soalan penyertaan semula Malaysia ke Statut Rom, Kerajaan akan terus mengkaji perkara ini secara menyeluruh, termasuk melalui perbincangan berterusan dengan semua pemegang taruh, sebelum sebarang keputusan dibuat.

5. Di sini saya ingin tekankan bahawa pihak Kerajaan akan sentiasa prihatin dengan mendengar, menghormati dan tidak membelakangkan pandangan rakyat dan pemegang taruh yang lain dalam hal menyertai dan meratifikasi sebarang instrumen antarabangsa. Pendekatan yang teliti dan menyeluruh sebegini adalah penting bagi memastikan

peruntukan-peruntukan di bawah instrumen antarabangsa tersebut adalah selaras dan tidak bercanggah dengan undang-undang domestik sedia ada.

6. Bagi memastikan proses libat urus memberi impak yang lebih, Kementerian Luar Negeri telah bekerjasama dengan Pejabat Pesuruhjaya Tinggi PBB bagi Hak Asasi Manusia (OHCHR) untuk menterjemahkan 9 instrumen teras hak asasi manusia dan Statut Rom ke dalam Bahasa Malaysia. Usaha ini bertujuan untuk meningkatkan kesedaran rakyat dan semua pihak yang berkepentingan dengan memberi pemahaman yang tepat mengenai obligasi dan tanggungjawab negara serta implikasi perjanjian-perjanjian tersebut sekiranya Malaysia menyertai dan meratifikasi setiap triti yang dikenal pasti. Inisiatif tersebut juga merupakan komitmen yang telah diberikan oleh Malaysia semasa proses melobi keanggotaan ke MHAM bagi penggal 2022–2024.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

TARIKH : 22 MAC 2022 (SELASA)

SOALAN

TUAN KESAVAN A/L SUBRAMANIAM [SUNGAI SIPUT] minta **PERDANA MENTERI** menyatakan dengan Visi Kemakmuran Bersama 2030, Kerajaan berhasrat mengurangkan jurang kedudukan sosio ekonomi rakyat Malaysia. Pegangan ekuiti adalah satu aras yang dapat mencerminkan kedudukan ekonomi sesuatu kaum. Apakah ekuiti masyarakat mengikut kaum pada masa sekarang dan apakah sasaran yang hendak dicapai pada 2030.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Ahli Yang Berhormat, Kerajaan sentiasa berusaha menangani jurang ekonomi dalam kumpulan pendapatan, etnik, pembangunan wilayah dan rantaian bekalan bagi membela dan meningkatkan keupayaan semua Keluarga Malaysia supaya tiada yang ketinggalan selaras dengan Wawasan Kemakmuran Bersama 2030.

2. Pemilikan ekuiti (modal saham) dalam sektor korporat merupakan antara petunjuk yang digunakan oleh Kerajaan bagi mengukur kedudukan dan pencapaian kumpulan etnik utama dalam ekonomi. Seperti yang telah diumumkan dalam pembentangan Rancangan Malaysia Kedua Belas (RMKe-12) oleh YAB Perdana Menteri pada 26 September 2021 di Dewan Rakyat, pemilikan ekuiti sektor korporat pada tahun 2019 berasaskan nilai pasaran adalah seperti berikut:

- pegangan Bumiputera 17.2 peratus;
- pegangan bukan Bumiputera 25.0 peratus;
- pegangan asing 45.5 peratus; dan
- nomini 12.3 peratus.

3. Daripada 25 peratus pegangan ekuiti bukan Bumiputera, sebanyak 24.3 peratus adalah pegangan kaum Cina, 0.5 peratus pegangan kaum india dan 0.2 peratus pegangan bukan Bumiputera lain.

4. Selaras dengan Wawasan Kemakmuran Bersama 2030, Kerajaan komited untuk merapatkan jurang ekonomi antara kaum. Bagi masyarakat India, Unit Transformasi Masyarakat India (MITRA) di bawah Kementerian Perpaduan Negara telah dipertanggungjawab bagi menangani isu pembangunan sosioekonomi masyarakat India. Antara fungsi utama MITRA adalah mengenalpasti isu dan cabaran semasa

masyarakat India Malaysia, melaksana inisiatif pembangunan sosioekonomi bagi masyarakat India Malaysia dan menyelaraskan kerjasama antara Kerajaan dan pihak swasta ke arah pembangunan masyarakat India Malaysia secara holistik.

5. Tambahan pula, Jemaah Menteri pada 26 Januari 2022 telah bersetuju supaya Jawatankuasa Kabinet Mengenai Pembangunan Sosioekonomi India ditubuhkan dan akan dipengerusikan sendiri oleh YAB Perdana Menteri bagi memastikan isu pembangunan sosioekonomi masyarakat India dapat ditangani.

6. Berhubung sasaran yang hendak dicapai menjelang tahun 2030, Kerajaan masih mengekalkan sasaran untuk mencapai pemilikan ekuiti korporat Bumiputera sekurang-kurangnya 30 peratus. Penetapan sasaran ini adalah kesinambungan daripada sasaran yang telah dibuat sejak melalui Dasar Ekonomi Baru (DEB) yang sehingga kini masih belum dicapai.

7. Kerajaan terus komited bagi mengurangkan jurang kedudukan sosio ekonomi rakyat Malaysia ke arah mencapai Malaysia Makmur, Inklusif, Mampan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN MA'MUN BIN SULAIMAN [KALABAKAN]

TARIKH : 22 MAC 2022 (SELASA)

SOALAN

TUAN MA'MUN BIN SULAIMAN [KALABAKAN] minta **PERDANA MENTERI** menyatakan kesediaan Kerajaan menggesa pengurusan FELDA untuk menambah bilangan peneroka di Sabah dengan memperuntukkan tanah-tanah komersial FELDA kepada sekurang-kurangnya 2,000 peneroka baharu. Dengan usaha ini maka lebih ramai warga Sabah yang miskin terpilih dapat diberi peluang meningkatkan ekonomi mereka. Objektif utama penerokaan tanah-tanah di Sabah adalah membantu warga Sabah sebagai peneroka berjaya dan bukannya bertumpu kepada pengusaha ladang-ladang komersial FELDA yang menguntungkan satu pihak sahaja.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Kerajaan telah menghentikan pengambilan peneroka baharu di semua tanah rancangan FELDA seluruh negara mulai 1 Januari 1990. Keputusan tersebut diambil berikutan sumber kewangan yang terhad untuk membiayai pembangunan dan infrastruktur di tanah rancangan. Sebagai gantinya, pengurusan tanah rancangan yang tidak mempunyai peneroka dijadikan sebagai ladang komersil dan dikendalikan oleh FELDA untuk membiayai kos pengurusan dan pembinaan infrastruktur di tanah rancangan.
2. Namun begitu, FELDA sedang mengkaji kaedah pelaksanaan yang bersesuaian bagi menempatkan peneroka baharu di Sabah. Antara kaedah yang sedang dikaji termasuklah sistem hak milik secara kumpulan dan sistem saham. Kedua-dua sistem ini pernah diperkenalkan kepada peneroka. Walaupun kedua-dua sistem ini tidak memberikan hak milik tanah kepada peneroka, namun ianya akan memberikan pulangan pendapatan lebih tinggi.
3. Sebagai contoh, FELDA pernah membangunkan tanah ladang di Sabah berdasarkan kaedah sistem saham bagi tanah milik Koperasi Pembangunan Kaum Murut Kalabakan Berhad. FELDA telah memajukan dan membiayai kos pembangunan, pengurusan dan penyelenggaraan tanah serta melantik FELDA Plantations Sdn. Bhd. sebagai agen pengurusan untuk mentadbir dan menguruskan ladang tersebut. Koperasi berkenaan telah menerima keuntungan yang dibayar secara tunai dan juga saham Koperasi Permodalan FELDA Berhad. Seramai 237 ketua keluarga Murut juga diiktiraf sebagai peserta rancangan tidak bermastautin dan dibayar sejumlah keuntungan ladang setiap tahun dalam bentuk saham dan tunai.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI RICHARD RIOT ANAK JAEM
(SERIAN)**

**TARIKH : 22 MAC 2022
(SELASA)**

SOALAN

Dato' Sri Richard Riot Anak Jaem (Serian) meminta **MENTERI KANAN PERTAHANAN** menyatakan bilakah Pos Kawalan sempadan akan dibina di Kampung Mongkos Serian.

JAWAPAN

Tuan Yang di-Pertua,

Pada masa ini, terdapat 17 buah pos kawalan sempadan Tentera Darat Malaysia (TDM) yang berada di sepanjang sempadan Malaysia-Kalimantan dimana 10 buah pos terletak di sempadan Sarawak-Kalimantan dan 7 buah pos di sempadan Sabah-Kalimantan. Bagi Sarawak, sebanyak 4 buah pos kawalan sempadan yang sedang dibina dan dijangka siap pada suku kedua tahun 2022. Manakala tambahan 3 buah pos lagi akan dibina pada suku keempat tahun 2022.

Pemilihan kawasan bagi pembinaan pos kawalan sempadan oleh TDM adalah tertumpu di kawasan yang kerap berlakunya aktiviti lintas sempadan di mana kebiasaannya kawasan tersebut kurang berpenduduk atau pendalaman. Manakala kawasan yang berpenduduk pula akan dikawal oleh pihak Polis Diraja Malaysia (PDRM). Sehubungan dengan itu, tiada perancangan bagi pembinaan pos kawalan sempadan di Kampung Mongkos kerana telah terdapat pos kawalan sempadan yang berhampiran iaitu Pos Bunan Gega yang dikawal oleh Pasukan Gerakan Am-PDRM. Walau bagaimanapun, terdapat perancangan bagi pembinaan pos kawalan sempadan baharu TDM yang akan dibina berhampiran Kampung Mongkos iaitu di Ladang Kelapa Sawit Tetangga Akrib. Jarak lokasi pembinaan adalah sejauh kira-kira 6 km dari Kampung Mongkos dan pembinaan dijangka akan bermula pada suku keempat tahun 2022, iaitu selepas selesainya pembinaan 4 pos kawalan sempadan di Sarawak.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : TUAN SIM CHEE KEONG
[BUKIT MERTAJAM]**

TARIKH : 22 MAC 2022 (SELASA)

SOALAN

Tuan Sim Chee Keong [Bukit Mertajam] minta **PERDANA MENTERI** menyatakan perbelanjaan keseluruhan setiap satu pilihan raya negeri yang terbaru di Sabah, Melaka, Sarawak dan Johor. Berikan pecahan mengikut negeri.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Kos perbelanjaan SPR bagi pelaksanaan beberapa siri PRU DUN selepas PRU Ke-14 adalah seperti berikut:
 - (a) PRU DUN Sabah ke-16 : **RM130,000,000.00**
 - (b) PRU DUN Melaka ke-15 : **RM45,000,000.00**
 - (c) PRU DUN Sarawak ke-12 : **RM149,000,000.00**
 - (d) PRU Dewan Negeri Johor ke-15: **RM96,000,000.00**
2. Kesemua kos tersebut adalah merangkumi perolehan pembelian dan sewaan peralatan pilihan raya, kenderaan, pembangunan ICT, logistik, elaun petugas dan keperluan-keperluan lain yang berkaitan. Perbelanjaan ini turut mengambil kira peralatan mengikut garis panduan pencegahan COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN AHMAD FADHLI BIN SHAARI
(PASIR MAS)**

TARIKH : 22 MAC 2022 (SELASA)

SOALAN

TUAN AHMAD FADHLI BIN SHAARI [PASIR MAS] minta **MENTERI KANAN KERJA RAYA** menyatakan usaha Kerajaan bagi menyelia dan membaik pulih Lebuhraya Gerik-Jeli yang sangat merbahaya kepada para pengguna terutama pada waktu malam akibat garisan putus-putus yang sudah pudar di beberapa lokasi.

JAWAPAN

Tuan Yang Di-Pertua,

Untuk makluman Ahli Yang Berhormat, laluan Lebuhraya Gerik-Jeli yang dimaksudkan adalah laluan FT004 yang turut dikenali sebagai Lebuhraya Timur Barat dengan panjang keseluruhannya adalah 292.39 km yang menghubungkan tiga (3) negeri iaitu Kedah – Perak – Kelantan. Laluan ini juga merupakan laluan utama yang menghubungkan antara negeri Pantai Timur dengan negeri Pantai Barat.

Untuk makluman Ahli Yang Berhormat, Kementerian mengambil maklum berkenaan isu yang telah dibangkitkan iaitu garisan jalan pudar di laluan Lebuhraya Gerik – Jeli. Oleh yang demikian, Kementerian juga telah mengenal pasti kerosakan permukaan jalan (struktur pavemen) yang perlu dibuat pembaikan dan turapan semula terlebih dahulu sebelum melaksanakan kerja-kerja mengecat semula garisan jalan yang pudar.

Tahun ini (2022), Kementerian ini telah memperuntukkan sebanyak RM17.2 juta bagi kerja-kerja penyenggaraan berkala pavemen dan berkala bukan pavemen yang dilaksanakan oleh syarikat konsesi melalui Arah Kerja (AK) di laluan FT004 tersebut. Kerja-kerja penyenggaraan tersebut melibatkan tujuh belas (17) kerja berkala pavemen dan satu (1) kerja berkala bukan pavemen yang meliputi kerja turapan semula struktur pavemen berserta kerja penandaan garisan jalan yang baharu. Kerja-kerja tersebut sedang dilaksanakan di tapak dan dijangka akan disiapkan pada Jun 2022.

Untuk makluman Ahli Yang Berhormat, Kementerian Kerja Raya Malaysia melalui Jabatan Kerja Raya sentiasa komited dalam memastikan jalan persekutuan sentiasa dalam keadaan yang selamat dan selesa dengan menjalankan kerja-kerja penyenggaraan rutin dan berkala sepanjang tahun. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN LIM KIT SIANG [ISKANDAR PUTERI]

TARIKH : 22 MAC 2022 (SELASA)

SOALAN

TUAN LIM KIT SIANG [ISKANDAR PUTERI] minta **PERDANA MENTERI** menyatakan mengapa pengurusan hal ehwal minyak dan gas negara masih dikawal selia oleh *Malaysian Petroleum Management*, sebuah unit di dalam Petronas yang pada masa yang sama turut mengawal selia diri sendiri, suatu keadaan yang berpotensi menimbulkan konflik berkepentingan.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Petroliaam Nasional Berhad (PETRONAS) adalah sebuah syarikat hak milik penuh Kerajaan Malaysia yang diasaskan mengikut Akta Kemajuan Petroleum 1974 [Akta 144] bagi membangun dan memajukan sumber petroleum di seluruh Malaysia supaya industri minyak dan gas negara sentiasa mampan.
2. Tanggungjawab ini dilaksanakan oleh PETRONAS melalui sebuah unit di dalam PETRONAS iaitu *Malaysia Petroleum Management* (MPM) yang menjalankan fungsi kawal selia dan tadbir urus pembangunan operasi industri hulu minyak dan gas negara.

3. Peranan yang dijalankan oleh PETRONAS melalui MPM, telah membuahkan hasil di mana blok-blok minyak dan gas yang belum diterokai, telah dibida dan kemudiannya dibangunkan oleh syarikat-syarikat minyak dan gas antarabangsa mahupun tempatan yang berkelayakan seperti Shell, ExxonMobil dan Hibiscus Petroleum.
4. Bagi memastikan para pelabur menjalankan kerja-kerja operasi penerokaan, pembangunan dan pengeluaran minyak dan gas dengan telus dan teratur, pelabur-pelabur ini mengikat perjanjian bersama PETRONAS melalui Kontrak Perkongsian Pengeluaran ataupun lebih dikenali sebagai *Production Sharing Contract* (PSC) yang berlandaskan Akta 144. MPM juga mengeluarkan dan mengurus tadbir dasar serta garis panduan untuk digunapakai oleh semua pelabur yang beroperasi dalam industri hulu minyak dan gas di Malaysia.
5. PSC adalah salah satu bentuk kontrak perjanjian petroleum yang diterimapakai oleh industri hulu di seluruh dunia. Berdasarkan rekod PETRONAS sehingga 31 Disember 2021, terdapat 33 pelabur-pelabur hulu di mana hampir 75% adalah pelabur asing yang terlibat di dalam hampir 100 PSC yang sedang aktif.
6. PETRONAS juga telah menubuhkan PETRONAS Carigali Sdn. Bhd. (PCSB) (anak syarikat milik penuh PETRONAS) pada tahun 1978, untuk meluaskan penglibatan PETRONAS serta rakyat tempatan dalam industri minyak dan gas khususnya sektor hulu, sebagai kontraktor yang berkepakaran di dalam bidang ini. Seperti pelabur-pelabur asing yang terlibat di dalam industri hulu minyak dan gas di Malaysia, PCSB perlu mematuhi terma-terma PSC yang telah ditandatangani bersama rakan kongsi iaitu pelabur-pelabur yang lain. PCSB juga perlu mematuhi polisi dan garis panduan yang sama yang dikenakan oleh MPM ke atas pelabur-pelabur yang lain.
7. Kini, PCSB telah berjaya meluaskan sayap operasinya ke peringkat antarabangsa di lebih 20 buah negara. Walaupun MPM dan PCSB adalah unit serta anak syarikat PETRONAS, setiap satunya mempunyai pengurusan dan tadbir urus serta objektif yang berlainan. PETRONAS dan setiap anak syarikatnya mempunyai lembaga pengarah yang

berasingan berserta dengan pengarah bebas (*independent directors*) dan bertindak secara bebas mengikut had kuasa (*limits of authority*) masing-masing.

8. Struktur MPM sebagai sebuah unit di dalam PETRONAS membolehkan ia merangka pelan dan strategi yang lebih menyeluruh dengan mengambil kira kesan positif atau negatif ke atas rantai nilai bersepadu minyak dan gas, termasuk industri hiliran, pemprosesan, LNG, petrokimia dan lain-lain, bagi meneruskan pelaburan yang stabil dan kondusif serta memaksimakan perolehan pendapatan negara.

9. Keberkesanan dan keupayaan PETRONAS dalam membangunkan industri minyak dan gas negara di bawah Akta 144 telah terbukti mendatangkan hasil yang sangat positif kepada negara. Kesemua ini telah menyumbang kepada kejayaan PETRONAS dalam merencanakan pelaburan sektor hulu kepada lebih daripada RM 650 bilion sejak 1974 serta pengekalan bekalan minyak dan gas negara (*security of supply*) pada tahap pengeluaran petroleum 1.6 juta tong setara sehari (*millions of barrels of oil equivalent per day*) walaupun industri turut terkesan akibat pandemik Covid-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN AHMAD JOHNNIE BIN ZAWAWI
(IGAN)**

TARIKH : 22 MAC 2022 (SELASA)

SOALAN

TUAN AHMAD JOHNNIE BIN ZAWAWI [IGAN] minta **MENTERI KANAN KERJA RAYA** menyatakan berapa peruntukan infrastruktur di bawah Kementerian Kerja Raya yang diperuntukkan untuk Sarawak di dalam Belanjawan 2022 dan apakah projek- projek infra yang akan dilaksanakan untuk Sarawak sepanjang tahun 2022 ini.

JAWAPAN

Tuan Yang Di-Pertua,

Untuk makluman Ahli Yang Berhormat, Pada tahun 2022, peruntukan Belanja Pembangunan di bawah Kementerian Kerja Raya (KKR) yang telah diluluskan bagi negeri Sarawak adalah sebanyak **RM1,104,600,000.00**. Peruntukan ini antara lainnya bagi membiayai pelaksanaan projek Lebuhraya Pan Borneo Sarawak dan juga *Sabah Sarawak Link Road (SSLR)*.

Di samping itu juga, Kementerian ini telah melaksanakan **penyenggaraan rutin** di Negeri Sarawak dengan peruntukan bernilai **RM 27.6 juta setahun**. Pada tahun **2022** sahaja, sejumlah **RM48.2 juta** telah diperuntukkan untuk pelbagai program penyenggaraan jalan seperti penyenggaraan berkala pavemen dan bukan pavemen, pembaikan kecil jambatan dan penyenggaraan lampu jalan/lampu isyarat.

Oleh itu, Kementerian ini sentiasa komited dalam melaksanakan kerja-kerja penyenggaraan dari semasa ke semasa bagi memastikan pengguna jalan raya persekutuan selamat dan selesa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN CHOW KON YEOW [TANJONG]

TARIKH : 22 MAC 2022 (SELASA)

SOALAN

TUAN CHOW KON YEOW [TANJONG] minta **MENTERI ALAM
SEKITAR DAN AIR** menyatakan status permohonan projek pembinaan
outfall dan struktur mencegah hakisan pantai di pantai Batu Ferringhi dan
Tanjong Bungah, Daerah Timur Laut, Pulau Pinang yang dimohon dalam
RMK-12.

JAWAPAN

Tuan Yang Di-Pertua,

1. Permohonan bagi projek pembinaan outfall dan struktur mencegah
hakisan pantai di pantai Batu Ferringhi dan Tanjong Bungah, Daerah
Timur Laut, Pulau Pinang telah dipohon sebagai projek baharu di dalam
Rolling Plan 3 (RP3) tahun 2023 RMKe-12 dengan anggaran kos
sebanyak RM 30 juta merangkumi skop kerja utama seperti:

1. Pengorekan Muara Sungai Mas, Sungai Kechil dan Sungai Kelian
 2. Pembinaan *outfall*
 3. Penambakan pantai (*Beach nourishment*)
 4. Penstabilan Tebing
 5. Pencegahan Hakisan Pantai di Pantai Miami
- Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB DATUK SERI HAJI AHMAD BIN HAJI MASLAN
[PONTIAN]**

TARIKH : 22 MAC 2022 (SELASA)

SOALAN :

minta **PERDANA MENTERI** menyatakan senarai dan nilai bantuan-bantuan untuk mangsa banjir dalam semua bentuk, setakat mana telah diberikan dan halangan seperti data yang tidak sahih sedangkan Kerajaan memiliki jentera yang lengkap hingga ke akar umbi di peringkat daerah, taman perumahan dan kampung.

JAWAPAN

**DIJAWAB OLEH YB DATUK DR ABD LATIFF BIN AHMD
MENTERI DIJABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Jumlah Ketua Isi Rumah (KIR) yang terkesan bagi Monsun Timur Laut (MTL) baru-baru adalah sebanyak 214,795 KIR (data pada 15 Mac 2022) di seluruh negara.
2. Kerajaan telah mengumumkan bantuan-bantuan yang diberikan kepada mangsa iaitu:
 - (i) Bantuan wang ihsan (RM1,000/ KIR);
 - (ii) Bantuan wang ihsan (Kematian - RM10,000 kepada keluarga mangsa);

- (iii) Bantuan Barangan Keperluan Asas (BBKA) sebanyak RM2,500/KIR;
- (iv) Baucar tunai barangan elektrik (RM500);
- (v) Sumbangan pembaikan rumah secara tunai bagi kerosakan rumah kurang RM5,000;
- (vi) Baik pulih rumah dan bina baharu rumah yang dilaksanakan oleh Kementerian Pembangunan Luar Bandar (KPLB) dan Kementerian Perumahan dan Kerajaan Tempatan (KPKT); dan
- (vii) Baucar Diskaun Automotif Keluarga Malaysia.

3. Berdasarkan data yang diterima daripada Unit Penyelarasan Pelaksanaan (ICU), Jabatan Perdana Menteri, jumlah Bantuan Wang Ihsan yang telah disalurkan kepada mangsa adalah sebanyak RM156.611 juta (data setakat 15 Mac 2022). Manakala jumlah KIR yang layak untuk menerima Bantuan Barangan Keperluan Asas (BBKA) adalah melibatkan 177,538 KIR. Ini melibatkan peruntukan sebanyak RM443.845 juta.

4. Bagi Sumbangan Pembaikan Rumah (had Nilai maksimum RM5,000), Unit Penyelarasan Pelaksanaan (ICU) telah mengenal pasti sebanyak 5,758 buah rumah. Bagi baik pulih rumah dan bina baharu dibawah KPLB dan KPKT, telah dikenal pasti sebanyak 13,629 buah rumah untuk baik pulih dan 178 buah rumah untuk bina baharu.

5. Kerajaan juga memberikan Program Bantuan Banjir Keluarga Malaysia iaitu pembelian Peralatan Elektrik Domestik dan baucar Automotif Keluarga Malaysia. Setakat ini, sejumlah 72,730 KIR telah menebus baucar elektrik yang melibatkan peruntukan sebanyak RM36.272 juta.

6. Bagi mengatasi isu seperti data yang tidak sahih, Kerajaan sememangnya menggembleng semua jentera pengurusan bencana di setiap peringkat bagi mengenal pasti dan menyaring senarai mangsa yang layak. Namun, terdapat beberapa isu yang perlu diteliti sebelum sesuatu permohonan diluluskan seperti:

- (i) Menenal pasti mangsa yang layak mendapat keseluruhan atau sebahagian bantuan;

(ii) Permohonan bertindih dari Ketua Isi Rumah (KIR) yang sama;
dan

(iii) Permohonan daripada mereka yang tidak layak.

7. Manakala dari segi percanggahan data seperti bilangan mangsa yang berpindah dan bilangan yang menerima bantuan, adalah ditekankan bahawa data sebegini adalah dinamik dan berubah dari semasa ke semasa lebih-lebih lagi apabila proses pemberian bantuan masih lagi berlangsung.

8. Selain itu, ingin ditekankan di sini supaya semua pihak merujuk kepada sumber rasmi bagi mendapatkan data yang sahih bagi sebarang perkara.

9. Kerajaan akan terus komited untuk memberi penerangan yang jelas termasuk berkenaan penyebaran data-data yang tidak sahih berkaitan dengan pengurusan bencana dan bantuan kepada mangsa. Yang Berhormat selaku wakil rakyat di Parlimen masing-masing juga berperanan untuk membantu dalam menyampaikan maklumat dan data yang sahih kepada rakyat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS (2022)**

PERTANYAAN : LISAN

**DARIPADA : YB TUAN HAJI WAN HASSAN BIN MOHD RAMLI
[DUNGUN]**

TARIKH : 22 MAC 2022 (SELASA)

SOALAN:

Minta **PERDANA MENTERI** menyatakan perkembangan terkini Pelaksanaan Dasar Tahfiz Negara sejak ia diperkenalkan.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

1. Pihak Kerajaan terus memberi perhatian terhadap pemerkasaan institusi tahfiz di Malaysia melalui Dasar Pendidikan Tahfiz Negara yang diperkenalkan sejak tahun 2017. Pelaksanaan dasar ini mendapat kerjasama yang baik daripada Majlis Agama Islam Negeri, Jabatan Agama Islam Negeri, agensi kerajaan persekutuan, dan persatuan tahfiz.

2. Secara ringkasnya, antara pencapaian DPTN sehingga 2021 ialah,

- i) mewujudkan Garis Panduan Penubuhan dan Pendaftaran Institusi Tahfiz;
- ii) pindaan terhadap Akta Pentadbiran Undang-Undang Islam (Wilayah-Wilayah Persekutuan) 1993 (Akta 505);
- iii) memperkenalkan tiga (3) model tahfiz seperti Tahfiz Bersepadu, Tahfiz Turath dan Tahfiz Kemahiran;
- iv) perluasan kerjasama program persijilan dan diploma Darul Quran;
- v) pelaksanaan kursus dan latihan kepada pengetua tahfiz swasta;
- vi) penyaluran bantuan khas penyelenggaraan kepada institusi pendidikan Islam; dan
- vii) penubuhan Jawatankuasa Akreditasi Tahfiz di bawah LEPAL.

3. Oleh itu, bagi memastikan dasar ini kekal relevan, satu pelan tindakan telah dibangunkan bersama pemegang taruh peringkat negeri dan agensi kerajaan berkaitan.

4. Sehingga kini, pelaksanaan DPTN mendapat kerjasama yang baik daripada Pihak Berkuasa Agama Negeri. Pelaksanaan dasar ini dilaporkan dari semasa ke semasa kepada Lembaga Penasihat Penyelarasan

Pelajaran dan Pendidikan Agama Islam (LEPAI), Jawatankuasa Pelaksana DPTN dan lain-lain jawatankuasa berkaitan pendidikan Islam di peringkat negeri. Jawatankuasa Induk DPTN juga bertanggungjawab memastikan penyelarasan dan keberkesanan pelaksanaan Pelan Tindakan 2.0 yang sedia ada.

5. Pada tahun ini, JAKIM selaku urus setia DPTN sedang dan akan melaksanakan perkara berikut dengan kerjasama Pihak Berkuasa Agama Negeri:

- i. Membangunkan garis panduan berkaitan pengurusan tahfiz;
- ii. Membangunkan garis panduan berkaitan kurikulum dan mata pelajaran tahfiz;
- iii. Membangunkan instrumen pengiktirafan institusi tahfiz dan huffaz;
- iv. Memperkukuh kerjasama dengan Jabatan Pembangunan Kemahiran (JPK), Kementerian Sumber Manusia dalam memberikan taklimat berkaitan kemahiran dan TVET; dan
- v. Menyelaras agihan bantuan khas kewangan kepada semua institusi pendidikan Islam termasuk tahfiz.

6. Kolaborasi antara agensi kerajaan, Pihak Berkuasa Agama Negeri dan persatuan tahfiz amat penting bagi memastikan setiap agenda pemerkasaan tahfiz melalui DPTN dapat mencapai objektifnya. Ini membuktikan kepedulian pihak Kerajaan terhadap perkembangan pendidikan tahfiz di Malaysia tetap diutamakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DATO' JOHARI BIN ABDUL
[SUNGAI PETANI]**

TARIKH : 22 MAC 2022 (SELASA)

SOALAN :

Minta **PERDANA MENTERI** menyatakan terdapat perbezaan hukuman oleh Mahkamah Syariah di negeri negeri dalam Malaysia. Adakah Kerajaan berhasrat membawa satu Rang Undang-Undang ke Parlimen agar semua isu-isu ini dapat diselaraskan.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI (HAL EHWAL ISLAM)**

Tuan Yang di-Pertua,

1. Perkara 74 Perlembagaan Persekutuan memperuntukkan bahawa perkara yang berkaitan dengan hal ehwal Islam adalah terletak di bawah bidang kuasa perundangan negeri. Perkara yang berkaitan dengan hal ehwal Islam dinyatakan satu persatu dalam Butiran 1, Senarai Kedua, Jadual Kesembilan, Perlembagaan Persekutuan.
2. Kuasa untuk menggubal undang-undang syariah bagi mentadbir dan mengawal selia semua perkara yang berkaitan dengan hal ehwal Islam adalah terletak pada Dewan Undangan Negeri. Oleh yang demikian, undang-undang syariah yang digubal oleh satu Dewan

Undangan Negeri sudah tentu akan berbeza dengan undang-undang Syariah yang digubal oleh Dewan Undangan Negeri yang lain.

3. Di Wilayah-Wilayah Persekutuan, undang-undang jenayah Syariah telah dikanunkan melalui Akta Kesalahan Jenayah Syariah (Wilayah-Wilayah Persekutuan) 1997 [Akta 559]. Manakala di negeri-negeri lain, undang-undang kesalahan jenayah Syariah juga telah dikanunkan melalui enakmen atau ordinan kesalahan jenayah syariah negeri-negeri.

4. Hukuman yang terdapat dalam Akta 559 dan enakmen atau ordinan kesalahan jenayah syariah negeri-negeri pula adalah terbatas dengan peruntukan di bawah Akta Mahkamah Syariah (Bidang Kuasa Jenayah) 1965 [Akta 355].

5. Namun begitu, Kerajaan sentiasa berusaha untuk menggubal model draf undang-undang bagi tujuan penyelarasan dan penyeragaman negeri-negeri seluruh Malaysia. Bagi tujuan ini, Kerajaan sedang dalam proses untuk menyeragamkan undang-undang kesalahan jenayah Syariah negeri-negeri seluruh Malaysia dari segi jenis kesalahan, jenis hukuman dan kadar hukuman.

6. Selain, beberapa penambahan peruntukan yang baharu akan turut dibuat, antaranya peruntukan yang memberikan budi bicara kepada mahkamah syariah untuk membuat perintah-perintah yang bersifat pemulihan (*rehabilitative*) agar undang-undang kesalahan jenayah syariah negeri-negeri yang seragam kelak tidak dilihat hanya bersifat menghukum (*punitive*) semata-mata.

7. Model draf undang-undang ini akan dibentangkan kepada negeri-negeri seluruh Malaysia untuk mendapatkan maklum balas dan pandangan melalui forum-forum seperti Majlis Dialog Undang-Undang dan Persidangan Penyelarasan Undang-Undang Syarak dan Sivil.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN WONG HON WAI [BUKIT BENDERA]

TARIKH : 22 MAC 2022 (SELASA)

SOALAN

TUAN WONG HON WAI [BUKIT BENDERA] minta **MENTERI ALAM
SEKITAR DAN AIR** apakah hasil penyertaan Malaysia di Persidangan
Perubahan Iklim Bangsa-bangsa Bersatu di Glasgow (COP26) pada
tahun 2021.

JAWAPAN

Tuan Yang Di-Pertua,

1. Untuk makluman Ahli Yang Berhormat, makluman Ahli Yang Berhormat, delegasi Malaysia yang diketuai oleh KASA telah mengikuti proses rundingan perubahan iklim di Persidangan Ke-26 Negara Ahli kepada Konvensyen Rangka Kerja Perubahan Iklim Pertubuhan Bangsa-Bangsa Bersatu (UNFCCC COP-26) di Glasgow Scotland dari 31 Oktober hingga 12 November 2021. Secara umumnya, delegasi rundingan Malaysia telah mengikuti proses rundingan bagi isu-isu utama rundingan seperti berikut:

- i. Mekanisme pasaran karbon di bawah Perjanjian Paris;
- ii. Mekanisme ketelusan pelaporan perubahan iklim;
- iii. Jangka masa sepunya bagi pelaksanaan *Nationally Determined Contributions* (NDC);
- iv. Pembiayaan perubahan iklim; dan
- v. Adaptasi perubahan iklim.

2. Selain proses rundingan perubahan iklim, Malaysia turut menyertai beberapa deklarasi secara sukarela di luar proses rundingan iaitu *Global Methane Pledge* anjuran Amerika Syarikat dan Kesatuan Eropah dan *Glasgow Leader's Declaration on Forest and Land Use* anjuran United Kingdom selaku presiden persidangan UNFCCC COP-26.

3. Persidangan UNFCCC COP-26 telah menghasilkan keputusan yang dinamakan sebagai *Glasgow Climate Pact* yang turut merangkumi keputusan-keputusan bagi agenda rundingan oleh delegasi Malaysia. Secara umumnya, Glasgow Climate Pact telah berjaya memuktamadkan agenda-agenda rundingan yang tertunggak sejak tahun 2019 disebabkan oleh pandemik COVID-19. Berdasarkan Glasgow Climate Pact, sebahagian besar pendirian negara di dalam isu-isu seperti mekanisme pasaran karbon, ketelusan pelaporan perubahan iklim, pembiayaan

SOALAN NO: 50

perubahan iklim dan jangka masa sepunya bagi NDC adalah selari dengan keputusan rundingan. Sehubungan itu, KASA berpandangan adalah penting untuk keputusan-keputusan berkaitan di dalam *Glasgow Climate Pact* diterjemahkan ke dalam pelaksanaan dasar negara terutamanya berkaitan dengan mekanisme pasaran karbon, obligasi pelaporan perubahan iklim, pelaksanaan NDC dan mengakses pembiayaan perubahan iklim dari dana antarabangsa.

4. Dalam masa yang sama, Kementerian juga telah memulakan proses libat urus bagi membincangkan pelaksanaan deklarasi yang disertai oleh Malaysia semasa di persidangan UNFCCC COP-26. Pada masa ini, KASA telah mengadakan perbincangan bersama kementerian dan agensi lain bagi mengenal pasti program dan inisiatif sedia ada dan baharu bagi pelaksanaan *Global Methane Pledge*. Amerika Syarikat melalui kedutaan di Kuala Lumpur juga turut menyatakan hasrat mereka untuk menyokong Malaysia dari aspek teknikal, teknologi dan kewangan bagi melaksanakan *Global Methane Pledge*.

5. Selain itu juga, KASA juga komited untuk terus terlibat di dalam proses rundingan perubahan iklim UNFCCC pada masa akan datang agar pendirian dan pandangan negara mengenai isu-isu perubahan iklim antarabangsa dapat diketengahkan dan diambil kira.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : TUAN WONG CHEN [SUBANG]

TARIKH : 22 MAC 2022 (SELASA)

SOALAN :

minta **PERDANA MENTERI** menyatakan :-

- (a) sama ada Azam Baki telah melanggar Peraturan-Peraturan Pegawai Awam (Kelakuan dan Tatatertib) 1993 semasa pembelian saham Gets Global Bhd. dan Excel Force MSC Bhd.; dan
- (b) apakah tindakan yang akan diambil terhadapnya jika pelanggaran disahkan.

JAWAPAN

**YB DATUK DR. HJ. ABDUL LATIFF BIN AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Untuk makluman Ahli Yang Berhormat, isu saham yang di pertikaikan oleh banyak pihak daripada parti pembangkang sebenarnya telahpun selesai. Selain daripada itu, isu ini juga telah diputuskan dan tiada kes oleh inkuiri pihak Suruhanjaya Sekuriti Malaysia (SC). Malahan, Ketua Pesuruhjaya Suruhanjaya Pencegahan Rasuah Malaysia (KPSPRM) telah pun melalui beberapa Jawatankuasa iaitu:

- i. Lembaga Penasihat Pencegahan Rasuah (LPPR),

- ii. Jawatankuasa Mencegah Rasuah Parlimen (JKMR); dan
- iii. Jawatankuasa Aduan (JKA).

2. Menerusi satu kenyataan SC pada 18 Januari 2022, suruhanjaya itu yang selesai menjalankan siasatan menjelaskan bahawa telah menyelesaikan siasatan berdasarkan bukti yang dikumpul dan SC tidak dapat memastikan secara muktamad jika terdapat pelanggaran di bawah Seksyen 25(4) Akta Perindustrian Sekuriti (Depositori Pusat) (SICDA) telah berlaku.

3. Oleh yg demikian, tiada keperluan lagi isu pemilikan saham oleh KPSPRM ini dipertikaikan. KPSPRM juga telah mengambil tindakan undang-undang terhadap pihak yang memfitnah beliau dan kes sedang dalam peringkat mahkamah dan sebarang ulasan kes ini juga akan menimbulkan *sub judice*.

4. Kerajaan tidak melindungi individu-individu tertentu atau mengambil tindakan terhadap orang-orang yang tertentu hanya kerana untuk memuaskan hati sesetengah pihak. Sesiapa sahaja bertanggungjawab akan dihadapkan ke muka pengadilan dan mahkamahlah yang akan menentukan sama ada orang itu bersalah atau tidak.

5. Sehubungan itu, semua pihak perlu menerima keputusan SC yang menjelaskan tidak ada kes terhadap KPSPRM berhubung akaun dagangan miliknya dan keputusan hasil siasatan SC perlu menjadi panduan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI SALAHUDDIN BIN AYUB
(PULAI)**

TARIKH : 22 MAC 2020 (SELASA)

SOALAN

DATUK SERI HAJI SALAHUDDIN BIN AYUB (PULAI) minta **MENTERI LUAR NEGERI** menyatakan jumlah pasport diplomatik yang dikeluarkan setiap tahun bermula tahun 2020 sehingga sekarang.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Pulaui atas pertanyaan yang dikemukakan.

Tuan Yang di-Pertua,

Untuk makluman Yang Berhormat, pengeluaran Pasport Diplomatik diselenggarakan oleh Kementerian ini bersama dengan Jabatan Imigresen Malaysia (JIM). Hanya mereka yang layak sahaja diberikan Pasport Diplomatik berdasarkan keputusan-keputusan mesyuarat-mesyuarat Jemaah Menteri yang ditambah baik dari semasa ke semasa.

2. Bilangan Pasport Diplomatik yang dikeluarkan sejak tahun 2020 adalah terkawal. Ini penting bagi memastikan ianya diberikan kepada mereka yang layak berdasarkan peraturan-peraturan yang telah ditetapkan sewajarnya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : TUAN AKMAL NASRULLAH BIN MOHD. NASIR
[JOHOR BAHRU]**

TARIKH : 22 MAC 2022 (SELASA)

SOALAN

TUAN AKMAL NASRULLAH BIN MOHD. NASIR [JOHOR BAHRU] minta **PERDANA MENTERI** menyatakan kos perbelanjaan yang telah dikeluarkan oleh keseluruhan agensi-agensi Kerajaan seperti SPR dan PDRM, jabatan-jabatan mahupun perbelanjaan Kementerian bagi mengadakan beberapa siri Pilihan Raya Negeri (PRN) selepas PRU14.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Kos perbelanjaan SPR bagi pelaksanaan beberapa siri PRU DUN selepas PRU Ke-14 adalah seperti berikut:
 - (a) PRU DUN Sabah ke-16 : **RM130,000,000.00**
 - (b) PRU DUN Melaka ke-15 : **RM45,000,000.00**
 - (c) PRU DUN Sarawak ke-12 : **RM149,000,000.00**
 - (d) PRU Dewan Negeri Johor ke-15: **RM96,000,000.00**
2. Kesemua kos tersebut adalah merangkumi perolehan pembelian dan sewaan peralatan pilihan raya, kenderaan, pembangunan ICT, logistik, elaun petugas dan keperluan-keperluan lain yang berkaitan. Perbelanjaan ini turut mengambil kira peralatan mengikut garis panduan pencegahan COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN ISNARAISSAH MUNIRAH MAJILIS
[KOTA BELUD]**

TARIKH : 22 MAC 2022 (SELASA)

SOALAN

PUAN ISNARAISSAH MUNIRAH MAJILIS [KOTA BELUD] minta **PERDANA MENTERI** menyatakan adakah Kerajaan bersedia untuk meminda akta 694 iaitu Akta Suruhanjaya Pencegahan Rasuah Malaysia 2009 bagi memastikan tindakan boleh diambil dengan lebih telus kepada mana-mana pegawai SPRM yang didakwa terlibat dengan isu moral, integriti mahupun rasuah.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, Penguatkuasaan dan pemakaian undang-undang jenayah di Malaysia, termasuklah Akta 694 adalah terpakai kepada semua warga negara, tidak kira pangkat atau jawatan yang dipegang termasuklah ke atas pegawai-pegawai SPRM sendiri. Pegawai-pegawai SPRM yang didapati terlibat dalam kesalahan jenayah termasuk rasuah akan diambil tindakan tegas dan tidak akan terlepas daripada tindakan undang-undang. Isu moral dan integriti adalah merupakan tindakan dalaman bagi sesebuah jabatan/agensi yang mana ianya juga tertakluk kepada semua pegawai awam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 22 MAC 2022 (SELASA)

SOALAN:

Minta **PERDANA MENTERI** menyatakan pendirian Kerajaan terhadap surat sokongan, sama ada Menteri-Menteri dan Timbalan mereka dibenarkan untuk mengeluarkan surat sokongan untuk pelantikan jawatan atau penganugerahan kontrak secara rundingan terus.

JAWAPAN

**DIJAWAB YB DATUK DR. ABDUL LATIFF BIN AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Untuk makluman Ahli Yang Berhormat, Kerajaan telah mengeluarkan garis panduan untuk tindakan ke atas sokongan yang diterima daripada pemimpin kerajaan atau mana-mana individu berpengaruh yang telah ditandatangani Ketua Setiausaha Negara pada 8 Mac 2010. Pegawai mahupun kakitangan kerajaan dilarang menggunakan sebarang surat sokongan untuk mempengaruhi mana-mana anggota pentadbiran membuat keputusan.
2. Garis panduan ini bertujuan untuk menerangkan kepada penjawat awam mengenai langkah-langkah yang harus diambil dalam menangani permohonan sokongan yang diterima daripada pemimpin kerajaan, individu berpengaruh atau mana-mana orang mengenai sesuatu urusan kerajaan.
3. Selain itu, garis panduan tersebut juga bertujuan untuk mengekalkan integriti kakitangan awam semasa membuat pertimbangan sesuatu permohonan.
4. Perkara ini juga selaras dengan Peraturan 4(2)(h), Peraturan-Peraturan Pegawai Awam (Kelakuan dan Tatatertib) yang menjelaskan surat sokongan merujuk kepada sebarang bawaan atau cubaan memberi sebarang bentuk pengaruh atau tekanan luar bagi menyokong atau memajukan tuntutan berhubungan dengan perkhidmatan awam, sama ada tuntutan itu berupa tuntutannya sendiri atau tuntutan anggota-anggota perkhidmatan awam yang lain.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN PANG HOK LIONG [LABIS]

TARIKH : 22 MAC 2022 (SELASA)

SOALAN

TUAN PANG HOK LIONG [LABIS] minta **MENTERI ALAM SEKITAR DAN AIR** menyatakan sebab-sebab banjir teruk masih kerap berlaku di Kuala Lumpur sedangkan SMART Tunnel yang dibina khas untuk menangani banjir dengan kos RM1,887 juta.

JAWAPAN

Tuan Yang Di-Pertua,

1. Kekerapan kejadian banjir yang berlaku di Bandaraya Kuala Lumpur adalah disebabkan banjir kilat. Banjir kilat adalah banjir yang berlaku dalam tempoh kurang daripada enam (6) jam akibat hujan lebat dan menyebabkan sistem saliran sedia ada tidak dapat menampung aliran air di permukaan yang tinggi.

2. Sebagai contoh, hujan lebat berterusan pada 7 Mac 2022 telah menyebabkan berlakunya banjir kilat di jalan-jalan utama pusat bandar Kuala Lumpur seperti Jalan Batu Bata, Kg Periuk, Kg Pasir Baru dan Kolej Telekom. Bacaan hujan yang tinggi telah direkodkan di Stesen Taman Desa SMART dengan bacaan 106.5mm dan Stesen Air Panas dengan bacaan 100.5mm yang menyamai hampir setengah jumlah purata hujan bulanan bagi Kuala Lumpur.

SOALAN NO: 56

3. Untuk makluman Yang Berhormat, SMART Tunnel telah berjaya mengurangkan kejadian banjir di Bandaraya Kuala Lumpur. Berdasarkan rekod JPS, pada tahun 2020 lencongan SMART telah diaktifkan operasi mode banjir sebanyak 62 kali dan telah merekodkan tiga belas (13) insiden banjir kilat. Pada tahun 2021, lencongan SMART telah diaktifkan sebanyak 36 kali, di mana mode 4 telah diaktifkan sebanyak dua (2) kali dan hanya empat (4) insiden banjir dilaporkan. Sehingga 10 Mac 2022, SMART Tunnel telah berjaya menyelamatkan pusat bandaraya dengan mengaktifkan operasi mode banjir sebanyak 527 kali.

4. Walau bagaimanapun, menyedari impak risiko banjir yang sangat besar terhadap Bandaraya Kuala Lumpur, JPS telah memulakan Program Pengurusan Banjir Kuala Lumpur (KLFM) sejak beberapa RMK yang lalu dengan mempertimbangkan kawasan tadahan seluas 520 km per segi, iaitu kawasan tadahan bagi sungai-sungai yang menyumbang aliran ke Bandaraya Kuala Lumpur. Memandangkan kos pelaksanaan keseluruhan KLFM amat tinggi, pelaksanaan program ini terpaksa dilakukan dalam empat (4) fasa utama yang mana fasa pertama adalah pembinaan SMART.

5. SMART dibina bagi mengurangkan risiko dan impak banjir terhadap Bandaraya Kuala Lumpur yang dibawa oleh aliran air dari Hulu Sungai Klang, Sungai Kemensah dan Sungai Ampang yang mana hanya meliputi kawasan tadahan seluas 160 km per segi (30% dari keluasan kawasan tadahan KLFM iaitu 520 km per segi). SMART mampu menangani aliran air dari ketiga-tiga sungai ini dengan tahap perlindungan 100 ARI di antara pertemuan Sg Ampang dan Sg Klang. Sekiranya hujan lebat di luar lembangan sungai tersebut, air banjir tidak dapat disalur masuk ke terowong SMART kerana lembangan-lembangan tersebut tidak termasuk di dalam sistem yang telah direkabentuk bagi sistem Terowong SMART.

6. Terdapat beberapa sungai lagi yang menyumbang aliran ke Bandaraya Kuala Lumpur seperti di bawah;

- I. Lembangan Sungai Ampang dan Sungai Klang
- II. Lembangan Sungai Bunus
- III. Lembangan Sungai Gombak

SOALAN NO: 56

- IV. Lembangan Sungai Batu, Sungai Jinjang dan Sungai Keroh
- V. Lembangan Sungai Kerayong

7. JPS telah dan sedang melaksanakan beberapa fasa lagi iaitu Sistem Lencongan Banjir Gombak, Sistem Lencongan Banjir Keroh dan Program Rancangan Tebatan Banjir Sungai Bunus untuk menangani dan mengurangkan impak serta risiko banjir terhadap Bandaraya Kuala Lumpur.

8. Namun demikian, terdapat beberapa faktor yang boleh menyebabkan insiden banjir di Bandaraya Kuala Lumpur iaitu;

- a) Kuantiti hujan yang diterima melebihi dari tahap perlindungan dalam rekabentuk bagi setiap fasa,
- b) Intensiti hujan yang tinggi bertumpu di kawasan yang mempunyai tahap perlindungan yang rendah (di bawah 100 ARI), dan
- c) Kapasiti dan integriti sistem saliran di sekitar Bandaraya Kuala Lumpur yang boleh terjejas akibat tidak dinaiktaraf dan tersekat dengan sampah sarap mahupun sedimen.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK IGNATIUS DARELL LEIKING
[PENAMPANG]**

TARIKH : 22 MAC 2022 (SELASA)

SOALAN

DATUK IGNATIUS DARELL LEIKING [PENAMPANG] minta **MENTERI ALAM SEKITAR DAN AIR** menyatakan langkah-langkah yang diambil untuk menyelaraskan penjualan "Carbon Credit" di Malaysia bagi mengelakkan perjanjian berat sebelah atau yang merugikan negara agar negara benar-benar mendapat manfaat daripada penjualan tersebut dan hak- hak rakyat berkaitan penggunaan hutan adalah terpelihara.

JAWAPAN

Tuan Yang Di-Pertua,

1. Untuk makluman Ahli Yang Berhormat, selaras dengan keputusan Jemaah Menteri, Kementerian Alam Sekitar dan Air telah membangunkan panduan pasaran karbon secara sukarela (*Voluntary Carbon Market – VCM*) sebagai panduan umum kepada mana-mana entiti di dalam negara seperti pihak swasta dan Kerajaan Negeri yang ingin terlibat dengan pasaran VCM antarabangsa.

2. Selain itu, Jemaah Menteri juga telah bersetuju dengan pembangunan platform tunggal perdagangan karbon di peringkat domestik dengan kerjasama Kementerian Alam Sekitar dan Air, Kementerian Kewangan dan BURSA Malaysia. Kementerian ini menggalakkan entiti dalam negara seperti kerajaan negeri dan syarikat swasta untuk memanfaatkan platform ini bagi melaksanakan urusan niaga kredit karbon kerana ianya akan menjana sumber kewangan mampan bagi menyokong usaha pemuliharaan hutan dan biodiversiti, menggalakkan peralihan industri kepada aktiviti rendah karbon dan menarik pelaburan hijau dari luar negara. Platform tersebut sedang berada di dalam fasa pembangunan oleh pihak BURSA Malaysia dan dijangka siap pada hujung tahun 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

DARIPADA : TUAN PANG HOK LIONG (LABIS)

TARIKH : 22 MAC 2022 (SELASA)

SOALAN

TUAN PANG HOK LIONG (LABIS) minta **MENTERI LUAR NEGERI** menyatakan alasan sebenar Indonesia dan Switzerland menolak cadangan Ahli Parlimen Padang Rengas dan Pasir Salak sebagai Duta Besar Malaysia ke negara mereka masing-masing dan apakah jaminan akan diambil oleh Kerajaan supaya perkara paling memalukan atau *international embarrassment* seperti ini tidak berulang lagi.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Labis atas pertanyaan yang dikemukakan.

Tuan Yang di-Pertua,

2. Untuk makluman Dewan yang mulia ini, di dalam mengenal pasti dan seterusnya mengangkat cadangan calon Ketua Perwakilan Malaysia, sama ada Duta Besar mahupun Pesuruhjaya Tinggi ke sesebuah negara sahabat, pemilihan calon yang berkaliber dan mempunyai latar belakang yang bersesuaian amatlah penting. Ini memandangkan Ketua Perwakilan yang dilantik memikul tanggungjawab yang besar sebagai wakil rasmi negara, di samping mengetengahkan dan mempertahankan kepentingan Malaysia di negara-negara yang mereka ditauliahkan.

3. Merujuk pertanyaan Yang Berhormat Labis, ingin saya jelaskan di sini bahawa pencalonan Ahli Parlimen Padang Rengas tidak ditolak oleh kerajaan negara penerima. Walau bagaimanapun, ianya adalah disebabkan pencalonan tersebut tidak selari dengan dasar negara itu yang tidak menerima Ahli-Ahli Parlimen yang masih berkhidmat, dengan izin, *sitting Members of Parliament*, sebagai calon Duta Besar.

4. Berhubung isu pencalonan Ahli Parlimen Pasir Salak pula, Kementerian ingin nyatakan bahawa perkara tersebut masih dalam pertimbangan kerajaan negara penerima.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : PUAN ISNARAISSAH MUNIRAH MAJILIS
[KOTA BELUD]**

TARIKH : 22 MAC 2022 (SELASA)

SOALAN

PUAN ISNARAISSAH MUNIRAH MAJILIS [KOTA BELUD] minta **PERDANA MENTERI** menyatakan adakah Suruhanjaya Pilihan Raya (SPR) akan memastikan borang 13 dan 14 ditandatangani oleh Ketua Tempat Mengundi dan diberikan satu salinan kepada wakil parti yang bertanding serta adakah ianya akan dimasukkan di dalam penambahbaikan sistem pilihan raya yang sedang dijalankan.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI (PARLIMEN DAN
UNDANG-UNDANG)**

Tuan Yang di-Pertua,

Untuk makluman Ahli Yang Berhormat, berdasarkan Peraturan-Peraturan Pilihan Raya (Penjalanan Pilihan Raya) 1981, hanya salinan Borang 14 sahaja yang akan diberikan kepada setiap calon atau ejen pilihan raya atau ejen mengira undi yang hadir. Manakala bagi Borang 13, mereka hanya perlu menandatangani sahaja dan tiada salinan akan diberikan.

Walaupun bagaimanapun, sekiranya calon, ejen pilihan raya atau ejen mengira undi ingin mendapatkan maklumat pada Borang 13, mereka dibenarkan untuk menyalin maklumat berkenaan daripada borang asal berkenaan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB PUAN HAJAH FUZIAH BINTI SALLEH
(KUANTAN)**

TARIKH : 22 MAC 2022 (SELASA)

SOALAN

PUAN HAJAH FUZIAH BINTI SALLEH [Kuantan] minta **MENTERI KANAN KERJA RAYA** menyatakan sama ada jalan-jalan utama laluan dari persimpangan Sungai Soi sehinggalah ke Bandar Kuantan akan diturap semula dengan kualiti yang lebih baik setelah rosak teruk dan mendap disebabkan projek pembentungan oleh Syarikat Jalur Cahaya yang sedang dilaksanakan sekarang.

JAWAPAN

Tuan Yang Di-Pertua,

Untuk makluman Ahli Yang Berhormat, berdasarkan pertanyaan Jalan Persekutuan yang dimaksudkan adalah Laluan FT183 iaitu Jalan Padang Lalang - Tanjung Lumpur – Kampung Baharu, Kuantan di mana panjang keseluruhan laluan tersebut adalah sepanjang 16.60 km. Untuk makluman juga, projek yang sedang dijalankan adalah **Projek Pembinaan Loji Rawatan Kumbahan Serantau Dan Rangkaian Paip Pambetulan Di Bandar Kuantan**. Projek ini dilaksanakan oleh Kontraktor Jalur Cahaya Sdn. Bhd (JCSB) yang merupakan **projek di bawah seliaan Jabatan Perkhidmatan Pambetulan (JPP), Kementerian Air, Tanah, dan Sumber Asli**.

Untuk makluman Ahli Yang Berhormat, **skop penyenggaraan jalan yang terlibat dengan sebarang projek** sama ada milikan kerajaan mahu pun swasta adalah **dipertanggungjawabkan kepada pihak kontraktor / pemaaju yang dilantik** dengan merujuk kepada **syarat-syarat kelulusan Kebenaran Merancang**. Oleh yang demikian, sebarang kerosakan yang berlaku di tapak adalah **di bawah tanggungjawab pihak kontraktor Jalur Cahaya Sdn. Bhd (JCSB)**. Pihak JKR seterusnya akan memastikan kerja-kerja pembaikan dilaksanakan dengan sempurna sebagai syarat penerimaan semula tanggungjawab penyenggaraan bagi kawasan kerja yang terlibat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : TUAN KHOO POAY TIONG
[KOTA MELAKA]**

TARIKH : 22 MAC 2022 (SELASA)

SOALAN

TUAN KHOO POAY TIONG [KOTA MELAKA] minta **PERDANA
MENTERI** menyatakan :-

- (a) tarikh persaraan wajib tujuh ahli Suruhanjaya Pilihan Raya (SPR) yang sedia ada; dan
- (b) apakah kriteria dan proses yang digunakan oleh Kerajaan dalam mencalonkan pelantikan ahli-ahli SPR baharu kepada Yang di-Pertuan Agong.

JAWAPAN**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

(a) Tarikh Persaraan Wajib Ahli SPR Sedia Ada

Untuk makluman Ahli Yang Berhormat, selaras dengan Perkara 114 (3), Perlembagaan Persekutuan, seseorang anggota Suruhanjaya Pilihan Raya adalah terhenti daripada memegang jawatan apabila mencapai umur 66 enam tahun atau apabila hilangan kelayakan di bawah Fasal (4) atau pada bila-bila masa meletakkan jawatan. Tarikh persaraan anggota SPR sedia ada apabila mencapai umur 66 tahun selaras dengan Perkara 114(3), Perlembagaan Persekutuan adalah seperti berikut:

Nama	Jawatan	Tarikh Persaraan
YBhg. Datuk Abdul Ghani Bin Salleh	Pengerusi	10.05.2024
YBrs. Dr. Azmi Sharom	Timbalan Pengerusi	28.01.2035
YBhg. Dato' Chin Phaik Yoong	Ahli	25.12.2022
YBrs. Puan Zoe Randhawa	Ahli	18.11.2054
YBrs. Dr. Mohd Faisal S. bin Abd. Hazis	Ahli	08.07.2040
YBhg. Dato' Awang Sahari Bin E.M. Nadzeer	Ahli	25.11.2022
YBhg. Datuk Nik Ali Bin Mat Yunus	Ahli	19.05.2024

(b) Kriteria dan Proses Pelantikan Ahli SPR

Untuk makluman Ahli Yang Berhormat, pelantikan anggota Suruhanjaya Pilihan Raya Malaysia adalah melalui Perkara 114(1) dan (2) Perlembagaan Persekutuan yang memenuhi keperluan sepertimana yang dinyatakan dalam Perkara 114(3) dan (4) Perlembagaan Persekutuan seperti berikut:

- (i) Anggota SPR yang dilantik belum mencapai umur enam puluh enam tahun; dan
- (ii) Anggota SPR yang dilantik tidak boleh bankrap, melibatkan diri dalam apa-apa jawatan/pekerjaan berbayar di luar tugas jawatannya atau menjadi ahli mana-mana satu Majlis Parlimen atau Dewan Undangan sesuatu Negeri

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

DARIPADA : PUAN WONG SHU QI [KLUANG]

TARIKH : 22 MAC 2022 (SELASA)

SOALAN

PUAN WONG SHU QI [KLUANG] minta **PERDANA MENTERI** menyatakan status terkini keputusan Jawatankuasa Khas Kabinet Mengenai Anti Rasuah pada 2 September 2020 meminda Seksyen 5 (1) Akta SPRM 2009 agar pelantikan Ketua Pesuruhjaya SPRM dibuat melalui undian Parlimen. Apakah tindakan Kerajaan bagi menambah baik integriti SPRM.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, Pada masa ini Suruhanjaya Pencegahan Rasuah Malaysia (SPRM) sedang giat melaksanakan inisiatif-inisiatif di bawah Pelan Anti Rasuah Nasional (NACP) 2019 – 2023 di mana di antara inisiatif utama yang diterajui oleh Suruhanjaya ini adalah inisiatif bagi memperkasa SPRM melalui Pelantikan Ketua Pesuruhjaya SPRM.

Dalam Mesyuarat Jawatankuasa Khas Kabinet Mengenai Anti-Rasuah (JKKMAR) Siri 11 Bil. 1/2020 pada 7 Januari 2020, SPRM telah mengesyorkan cadangan bagi memasukkan peruntukan baharu berkaitan perantikan dan penamatan perkhidmatan Ketua Pesuruhjaya (KP) SPRM melalui pindaan ke atas Perlembagaan Persekutuan serta Undang-Undang Am Persekutuan (Akta 694).

Usaha-usaha dalam pelaksanaan inisiatif ini masih berjalan dengan sesi-sesi libat urus bersama pihak Jabatan Peguam Negara (AGC) dan pihak-pihak berkepentingan lain seperti Kementerian Kewangan dan Jabatan Perkhidmatan Awam.

SPRM juga komited dalam usaha untuk memastikan integriti yang tinggi dalam kalangan warganya. Antara usaha – usaha yang telah dilakukan ialah seperti berikut:

- 1) Penggubalan Kod Etika dan Tatakelakuan untuk menggalakkan akauntabiliti dan memantapkan integriti dalam kalangan warga SPRM ke arah pencapaian prestasi kerja yang cemerlang. Kod Etika dan Tatakelakuan ini menjelaskan norma kelakuan dan panduan tingkah laku yang perlu dipatuhi oleh setiap warga SPRM bagi memastikan segala tindakan adalah selaras dengan

peruntukan undang-undang, peraturan dan arahan yang berkuat kuasa;

- 2) Pembangunan serta pelaksanaan Pelan Antirasuah SPRM (PARAS) 2021-2025 bertujuan untuk langkah kawalan dalaman. PARAS adalah usaha SPRM untuk menangani risiko perlakuan jenayah rasuah dan pelanggaran integriti oleh warga kerjanya dan seterusnya memperkukuhkan kecekapan sistem penyampaian perkhidmatan SPRM kepada masyarakat, dan
- 3) SPRM juga mengambil tindakan tatatertib terhadap mana-mana warganya yang melanggar Peraturan-Peraturan Pegawai Awam (Kelakuan dan Tatatertib) 1993 bagi kes-kes yang tidak bersifat jenayah.

Bagi memelihara integriti warga SPRM, tindakan *Integrity Testing* seperti ujian air kencing bagi pengesanan penggunaan bahan terlarang sentiasa diadakan secara berkala dan mengejut di semua SPRM Bahagian dan Negeri. Selain daripada itu, pemeriksaan pematuhan terhadap arahan-arahan dalaman SPRM juga diadakan secara berkala bagi memastikan warga SPRM menjalankan tugas mengikut prosedur yang telah ditetapkan. Laporan tindakan ini akan dibentangkan di dalam Mesyuarat Jawatankuasa Aduan (JKA).

Untuk makluman Yang Berhormat jua, salah satu jawatankuasa pemantau bebas SPRM adalah Jawatankuasa Aduan (JKA) yang ditubuhkan di bawah Seksyen 15 Akta SPRM 2009 (Akta 694). JKA berperanan untuk mengenal pasti apa-apa kelemahan dalam tatacara kerja Suruhanjaya yang mungkin menimbulkan aduan dan menggemukakan syor untuk penambahbaikan. JKA juga memantau pengendalian oleh Suruhanjaya terhadap aduan mengenai salah laku yang tidak bersifat jenayah terhadap pegawai-pegawai SPRM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MAHFUZ BIN HAJI OMAR
[POKOK SENA]**

TARIKH : 22 MAC 2022 (SELASA)

SOALAN

DATO' HAJI MAHFUZ BIN HAJI OMAR [POKOK SENA] minta **PERDANA MENTERI** menyatakan status kes Tan Sri Azam Baki, Ketua Pesuruhjaya SPRM yang telah mengakui akaunnya diguna oleh adiknya sedangkan kenyataan Suruhanjaya Sekuriti menyatakan akaun tersebut dikendalikan sendiri oleh beliau.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, isu saham yang di pertikaikan oleh banyak pihak daripada parti pembangkang sebenarnya telahpun selesai. Selain daripada itu, isu ini juga telah diputuskan dan tiada kes oleh inkuiri pihak Suruhanjaya Sekuriti Malaysia (SC). Malahan, Ketua Pesuruhjaya Suruhanjaya Pencegahan Rasuah Malaysia (KPSPRM) telah pun melalui beberapa Jawatankuasa iaitu:

- i. Lembaga Penasihat Pencegahan Rasuah (LPPR),
- ii. Jawatankuasa Mencegah Rasuah Parlimen (JKMR); dan
- iii. Jawatankuasa Aduan (JKA).

2. Menerusi satu kenyataan SC pada 18 Januari 2022, suruhanjaya itu yang selesai menjalankan siasatan menjelaskan bahawa telah menyelesaikan siasatan berdasarkan bukti yang dikumpul dan SC tidak dapat memastikan secara muktamad jika terdapat pelanggaran di bawah Seksyen 25(4) Akta Perindustrian Sekuriti (Depositori Pusat) (SICDA) telah berlaku.
3. Oleh yg demikian, tiada keperluan lagi isu pemilikan saham oleh KPSPRM ini dipertikaikan. KPSPRM juga telah mengambil tindakan undang-undang terhadap pihak yang memfitnah beliau dan kes sedang dalam peringkat mahkamah dan sebarang ulasan kes ini juga akan menimbulkan *sub judice*.
4. Kerajaan tidak melindungi individu-individu tertentu atau mengambil tindakan terhadap orang-orang yang tertentu hanya kerana untuk memuaskan hati sesetengah pihak. Sesiapa sahaja bertanggungjawab akan dihadapkan ke muka pengadilan dan mahkamahlah yang akan menentukan sama ada orang itu bersalah atau tidak.
5. Sehubungan itu, semua pihak perlu menerima keputusan SC yang menjelaskan tidak ada kes terhadap KPSPRM berhubung akaun dagangan miliknya dan keputusan hasil siasatan SC perlu menjadi panduan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DR. AZMAN BIN ISMAIL
(KUALA KEDAH)**

TARIKH : 22 MAC 2022

SOALAN

Dr. Azman bin Ismail (Kuala Kedah) minta **MENTERI LUAR NEGERI** menyatakan komitmen Malaysia untuk memastikan bahawa keamanan dapat diwujudkan di Myanmar. Apakah yang Malaysia telah lakukan setakat ini.

JAWAPAN

Tuan Yang di-Pertua,

Saya mengucapkan terima kasih kepada **Yang Berhormat [Kuala Kedah]** di atas pertanyaan yang dikemukakan berkenaan pergolakan politik di Myanmar.

Tuan Yang di-Pertua,

2. Seperti yang Dewan yang mulia ini sedia maklum , kemelut politik di Myanmar adalah sangat rumit. Ianya membabitkan pertembungan kepentingan pelbagai pihak termasuklah pihak pemerintahan tentera Myanmar (Tatmadaw), kerajaan terdahulu pimpinan Aung San Suu Kyi dan *National League for Democracy* (NLD), *National Unity Government* (NUG) serta sayap bersenjataanya *People's Defence Forces* (PDF), kumpulan-kumpulan etnik bersenjata dan pihak-pihak berkepentingan yang lain.

3. NUG merupakan gabungan ahli parlimen yang dipilih oleh rakyat Myanmar semasa pilihanraya pada tahun 2020. Mereka mendakwa sebagai kerajaan yang sah dan menuntut keabsahan sebagai kerajaan yang dipilih oleh rakyat, susulan rampasan kuasa oleh Tatmadaw pada 1 Februari 2021.

4. Dalam hal ini, Malaysia berpandangan bahawa pengiktirafan terhadap kerajaan Myanmar yang sah adalah terpulang kepada kehendak dan keputusan rakyat Myanmar sendiri. Apa yang penting adalah suara rakyat diambil kira oleh pemerintah di Myanmar.

5. Malaysia sebagai sebuah negara jiran dan rakan seanggota dalam ASEAN menyokong usaha-usaha bagi mengembalikan Myanmar kepada keadaan yang normal. Ini akan dapat memastikan keselamatan dan kestabilan di rantau ASEAN sentiasa terpelihara.

6. Malaysia juga mengambil pendekatan untuk bersama-sama dengan Negara-negara Anggota ASEAN yang lain dalam menangani isu Myanmar berdasarkan kepada Kesepakatan Lima Perkara ASEAN (*ASEAN Five-Point Consensus - 5PC*) yang dipersetujui pada April 2021.

7. Ini mengambil kira bahawa ASEAN mempunyai pengaruh yang besar ke atas Tatmadaw dalam mengubah haluan dan kembali kepada landasan demokrasi. Myanmar pula mempunyai kepentingan yang besar dalam ASEAN. Dengan itu, segala usaha yang dilaksanakan oleh ASEAN di Myanmar akan memberi impak yang lebih berkesan.

Tuan Yang di Pertua,

8. Perkara utama yang sedang kita usahakan adalah bantuan kemanusiaan untuk rakyat Myanmar yang sedang menghadapi kesusahan ekoran pandemik COVID-19. Saya ingin memaklumkan bahawa Malaysia turut menyumbang kepada misi bantuan kemanusiaan ini.

9. Selain itu, Malaysia turut membangkitkan isu Myanmar di pelbagai perbincangan peringkat antarabangsa. Y.A.B. Perdana Menteri dalam siri Lawatan Rasmi beliau ke negara-negara ASEAN turut membangkitkan

isu ini dan menekankan pentingnya ASEAN terus berusaha memulihkan situasi di Myanmar.

10. Y.A.B. Perdana Menteri juga telah membangkitkan isu Myanmar semasa perbincangan dengan Perdana Menteri Kemboja selaku Pengerusi ASEAN pada 25 Januari 2022. Malaysia mahu ASEAN 5PC dilaksanakan secara menyeluruh, dan tindakan konkrit diambil oleh semua pihak di Myanmar untuk memulihkan keadaan di negara tersebut.

11. Malaysia yakin bahawa usaha-usaha ASEAN untuk membantu Myanmar menangani kemelut politik di negara tersebut akan berjaya sekiranya pihak tentera Myanmar memberikan kerjasama sepenuhnya, dan dengan sokongan berterusan oleh masyarakat antarabangsa. Malaysia akan terus memperhalusi usaha-usaha ASEAN menerusi perbincangan-perbincangan dua hala antara Malaysia dengan negara-negara yang sependirian agar satu jalan penyelesaian yang baik dicapai demi kemaslahatan rakyat Myanmar.

12. Dalam hal ini, Malaysia menyokong penuh usaha-usaha Utusan Khas. Malaysia akan terus menyokong usaha-usaha ASEAN dalam mencari penyelesaian yang berkekalan dan bermakna berkaitan krisis di Myanmar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : TUAN SANISVARA NETHAJI RAYER
A/L RAJAJI [JELUTONG]**

TARIKH : 22 MAC 2022 (SELASA)

SOALAN

Minta **PERDANA MENTERI** menyatakan siapakah menteri-menteri yang berada di luar negara semasa kejadian banjir luar biasa melanda negara ini pada Disember 2021 dan telah diarah oleh Perdana Menteri untuk membatalkan cuti mereka dan kembali ke tanah air.

JAWAPAN

**YB DATUK DR. ABD LATIFF BIN AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Pada 24 Disember 2021, YAB Perdana Menteri telah menggesa agar anggota Kabinet yang telah merancang percutian untuk membatalkan percutian mereka manakala yang telah berada di luar negara untuk kembali segera.

2. Gesaan ini dibuat supaya Ahli Yang Berhormat Menteri dan Timbalan Menteri dapat bersama-sama rakyat yang sedang dalam kesusahan menghadapi bencana banjir dan tanah runtuh yang telah berlaku di beberapa buah negeri iaitu negeri Selangor, Pahang, Negeri Sembilan, Johor dan beberapa buah negeri lain.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN LOKE SIEW FOOK
[SEREMBAN]**

TARIKH : 22 MAC 2022 (SELASA)

SOALAN :

Minta **PERDANA MENTERI** menyatakan secara terperinci jumlah bantuan kewangan yang telah disalurkan secara terus kepada mangsa-mangsa banjir besar Disember 2021 mengikut jumlah penerima di setiap kawasan Parlimen berlainan.

JAWAPAN

**DI JAWAB OLEH YB DATUK DR ABD LATIFF AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Kerajaan Persekutuan pada 29 Disember 2021 telah mengumumkan beberapa bantuan dan kemudahan di bawah inisiatif Bantuan Keluarga Malaysia dengan nilai keseluruhan sebanyak RM1.4 bilion. Pengumuman ini menzahirkan keprihatinan Kerajaan Persekutuan terhadap mangsa yang terkesan berikutan bencana banjir di dalam tempoh Monsun Timur Laut (MTL) 2021/2022.
2. Jumlah Ketua Isi Rumah (KIR) yang terkesan bagi Monsun Timur Laut (MTL) di seluruh negara baru-baru ini adalah sebanyak 214,795 Ketua Isi Rumah (KIR) (data setakat 15 Mac 2022).
3. Berdasarkan data yang diterima daripada Unit Penyelarasan Pelaksanaan (ICU), jumlah Bantuan Wang Ihsan yang telah disalurkan kepada mangsa adalah sebanyak RM156.611 juta (data setakat 15 Mac 2022). Manakala jumlah KIR yang layak untuk menerima Bantuan Barangan Keperluan Asas (BBKA) adalah melibatkan 177,538 KIR. Ini melibatkan peruntukan sebanyak RM443.845 juta.
4. Bagi Sumbangan Pembaikan Rumah (had Nilai maksimum RM5,000), Unit Penyelarasan Pelaksanaan (ICU) telah mengenal pasti sebanyak 5,758 buah rumah. Bagi baik pulih rumah dan bina baharu dibawah KPLB dan KPKT, telah dikenal pasti sebanyak 13,629 buah rumah untuk baik pulih dan 178 buah rumah untuk bina baharu.
5. Kerajaan juga memberikan Program Bantuan Banjir Keluarga Malaysia iaitu pembelian Peralatan Elektrik Domestik dan baucar Automotif Keluarga Malaysia. Setakat ini, sejumlah 72,730 KIR telah menebus baucar elektrik yang melibatkan peruntukan sebanyak RM36.272 juta.
6. Bagi perincian penerima, Kerajaan tidak mempunyai data jumlah

penerima mengikut Parlimen. Sebaliknya, pecahan data adalah mengikut negeri dan daerah.

7. Data jumlah penerima bagi daerah Seremban adalah seperti di bawah:

BANTUAN PASCA BANJIR DAERAH SEREMBAN

JENIS BANTUAN	KETUA ISI RUMAH (KIR)	JUMLAH (RM)
Bantuan Wang Ihsan (BWI)	1,332	1,332,000.00
Bantuan Barangan Keperluan Asas (BBKA)	1,198	2,995,000.00
Sumbangan Pembaikan Rumah	306	1,530,000.00
Peralatan Elektrik Domestik	624 (Yang telah ditebus di Negeri Sembilan)	312,000.00
Baik Pulih Rumah	320 (Jumlah untuk Negeri Sembilan)	4,800,000.00
Bina Baharu Rumah	32 (Jumlah untuk Negeri Sembilan)	1,792,000.00

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : TUAN ABDUL LATIFF
BIN ABDUL RAHMAN [KUALA KRAI]**

TARIKH : 22 MAC 2022 | SELASA

SOALAN

TUAN ABDUL LATIFF BIN ABDUL RAHMAN [KUALA KRAI] minta **PERDANA MENTERI** menyatakan adakah Kerajaan hari ini masih mengekalkan keputusan yang telah dibuat oleh Kerajaan PN sebelum ini untuk memasukkan juga isu pemindahan aset-aset LTH kepada UJSB dan isu penjualan ladang TH Plantations kepada syarikat Tamaco yang berlaku semasa pemerintahan kerajaan PH di dalam skop RCI Lembaga Tabung Haji.

JAWAPAN :

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI
(HAL EHWAL AGAMA)**

Tuan Yang Di-Pertua,

1. Sepertimana yang telah diumumkan pihak Kerajaan pada 14 dan 15 Julai 2021, Jemaah Menteri telah bersetuju untuk menubuhkan Suruhanjaya Siasatan DiRaja (RCI) bagi menyelesaikan isu-isu berbangkit serta dapatan berdasarkan hasil penelitian audit serta ulasan perunding-perunding audit bebas yang telah dijalankan antara tempoh 2014 hingga 2020.
2. Pihak **TH** tidak terlibat dalam menentukan butir-butir khusus untuk skop RCI kerana proses RCI berjalan secara bebas. Namun **TH** menyambut baik dan akan memberikan kerjasama sepenuhnya berdasarkan lunas-lunas perundangan bagi kelancaran proses RCI. **TH** juga yakin, hasil dapatan dan pandangan daripada ahli-ahli RCI akan dapat membantu menambah baik aspek tadbir urus dan pengurusan **TH** pada masa hadapan.
3. Aspek tadbir urus, integriti dan reputasi **TH** sebagai institusi simpanan kewangan Islam amat penting bagi memastikan keyakinan dan kepentingan orang ramai terjamin khususnya para pendeposit. **TH** telah dan senantiasa berusaha untuk melaksanakan proses penambahbaikan terhadap operasi dan urus tadbirnya demi kepentingan para pendeposit.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : YB PUAN HANNAH YEOH (SEGAMBUT)

TARIKH : 22 MAC 2022 (SELASA)

SOALAN

PUAN HANNAH YEOH [SEGAMBUT] minta **MENTERI KANAN KERJA RAYA** menyatakan langkah-langkah yang telah dan sedang diambil oleh Kementerian dalam usaha mengawal dan menangani kenaikan harga bahan pembinaan yang begitu tinggi sehingga memberi kesan kewangan yang teruk kepada syarikat-syarikat kecil dan kontraktor tempatan.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Kerja Raya sedar dan mengambil maklum akan kenaikan harga bahan binaan telah melanda negara bermula dari suku kedua tahun 2020 dan berlarutan sehingga kini. Walau bagaimanapun, punca utama kenaikan harga ini adalah disebabkan situasi pandemik di seluruh dunia, yang mana pengeluaran bahan binaan dan keseluruhan rantai bekalan binaan telah terjejas dan ini menyumbang kepada kenaikan harga bahan binaan.

Dalam pada itu, bahan binaan termasuk bahan besi tetulang telah meningkat sehingga 48% pada Mei 2021 berbanding Oktober 2020 (RM2,440.00 kepada RM3,605 per tan). Pada Disember 2021, harga bahan ini turun sebanyak 9% kepada sekitar RM3,295.00 per tan. Pada minggu pertama Mac 2022, harga besi tetulang kembali meningkat sebanyak 7% kepada sekitar RM3,510 per tan. Antara faktor kenaikan harga besi tetulang yang telah dikenalpasti daripada sesi libat urus yang telah diadakan adalah:

- a) Kenaikan harga bijih besi di seluruh dunia disebabkan kekurangan bekalan bijih besi kerana kebanyakan lombong bijih besi tidak dapat beroperasi dengan kapasiti penuh, kesan daripada bencana alam dan isu pandemik. Bijih besi dan besi lusuh merupakan bahan mentah utama untuk pengeluaran produk besi. Malaysia tidak terkecuali daripada impak kenaikan harga bahan mentah utama ini yang kebanyakannya diimport dari luar negara;
- b) Kesukaran mendapatkan bahan mentah bagi memproses besi tetulang iaitu bijih besi dan juga besi lusuh yang mana kedua-duanya diimport dari luar negara;

c) Kenaikan harga bahan api dan sumber tenaga asli yang merupakan kos pengeluaran besi tetulang;

d) Isu logistik yang menyumbang kepada kesukaran dan kelewatan penghantaran bahan binaan disebabkan situasi pandemik. Kos logistik yang berbeza mengikut lokasi bergantung kepada jarak dan penyedia perkhidmatan.

e) Pembelian dalam kuantiti yang kecil daripada peruncit atau kedai hardware kecil dengan terma kredit yang panjang.

Secara umumnya, harga purata bahan binaan lain bagi tempoh yang sama turut menunjukkan peningkatan. Harga bitumen gred 60/70 meningkat sebanyak 40% (RM1,575.00 kepada RM2,200.00 per tan); harga pasir sungai meningkat sebanyak 31% (RM29.00 kepada RM38.00 per tan); harga konkrit siap bancuh meningkat sebanyak 8% (RM206.00 kepada RM222.00 per meter padu); harga batu agregat meningkat sebanyak 17% (RM36.00 kepada RM41.00 per tan). Harga bagi bahan paip PVC meningkat sebanyak 10% (RM46.50 kepada RM51.00 per meter). Berdasarkan data yang diterbitkan oleh Jabatan Perangkaan Malaysia (DOSM), indeks harga kabel elektrik (*copper cable laid underground*) telah meningkat sebanyak 12% (99.9 kepada 111.4 mata indeks).

Kementerian Kerja Raya melalui agensinya sentiasa bekerjasama dengan agensi kerajaan berkaitan dan pihak industri berhubung isu kenaikan harga bahan binaan. Pihak yang terlibat merupakan pengeluar bahan binaan utama iaitu besi tetulang, simen, konkrit siap bancuh dan pasir serta persatuan pembekal bahan dan wakil kontraktor.

Hasil daripada sesi bersama industri, cadangan menguatkuasakan semula peruntukan Syarat Perubahan Harga (*Variation of Price – VOP*) telah dikemukakan. Pelaksanaan Pekeliling Baharu PK2.4 Pelaksanaan

Syarat Perubahan Harga (*Variation of Price – VOP*) di dalam kontrak kerja telah dilaksanakan pada 15 Julai 2021 dan berkuatkuasa mulai 1 Januari 2021 sehingga 31 Disember 2021 bagi empat bahan binaan iaitu besi tetulang, *crush aggregate*, *mild steel pipe* (paip air dan paip pembetulan) dan *copper*. Pindaan terkini pekeliling ini pada 1 Januari 2022 menyatakan, projek yang dalam pembinaan hendaklah disempurnakan selewat-lewatnya pada 30 Jun 2022. Bagi meneruskan kesinambungan dalam usaha untuk mengatasi peningkatan harga bahan binaan, kajian dan rayuan berkaitan VOP telah dilaksanakan oleh Kementerian ini dan Kerajaan telah bersetuju meluluskan peluasan penggunaan VOP bagi pelawaan secara sebut harga khusus bagi had nilai RM500 ribu hingga RM800 ribu. Kelonggaran ini terpakai bagi pengeluaran inden/surat setuju terima sehingga 31 Disember 2021.

Kementerian Kerja Raya melalui Lembaga Pembangunan Industri Pembinaan Malaysia (CIDB) sentiasa melaksanakan pemantauan harga purata bulanan dan menerbitkannya melalui Portal *National Construction Cost Centre* (N3C) di alamat n3c.cidb.gov.my. Data harga yang diterbitkan di portal ini membolehkan pemantauan dibuat terhadap trend harga. Harga bahan binaan ini dikumpulkan melalui kerjasama dengan beberapa persatuan berkaitan pembinaan dan diperolehi daripada kontraktor, pembekal dan peruncit. Aktiviti pemantauan harga bahan ini telah dilaksanakan semenjak dari tahun 2002.

Penetapan harga bahan juga adalah berdasarkan penawaran dan permintaan di pasaran terbuka. Selain itu, tiada keperluan AP ditetapkan bagi mengimport bahan binaan besi sejak tahun 2008, tiada duti import dikenakan selain prosedur import besi yang minima. KKR tidak mempunyai kuasa dalam mengawal harga bahan binaan ini.

Selaras dengan pengumuman peralihan negara ke fasa endemik yang akan berkuatkuasa pada 1 April 2022 dan pengoperasian penuh perniagaan melibatkan seluruh rantai nilai sektor pembinaan serta

pengumuman pelaksanaan beberapa projek mega, dijangkakan permintaan dan penawaran bahan binaan akan beransur pulih.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

**DARIPADA : DR. KELVIN YII LEE WUEN [BANDAR
KUCHING]**

TARIKH : 22 MAC 2022 (RABU)

SOALAN

DR. KELVIN YII LEE WUEN [BANDAR KUCHING] minta **MENTERI ALAM SEKITAR DAN AIR** menyatakan tentang perkembangan Projek Pembangunan Lembangan Sungai Bersepadu (PLSB) Sungai Sarawak, jangka masa ia akan disiapkan dan sebab projek ini telah tertangguh dari jangka masa yang sepatutnya.

JAWAPAN

Tuan Yang Di-Pertua,

1. Untuk makluman Yang Berhormat, Projek Pembangunan Lembangan Sungai Bersepadu (PLSB) Sungai Sarawak dalam Rancangan Malaysia Ke Sebelas (RMKe-11) dengan kos projek berjumlah RM150 Juta. Projek ini diteruskan pelaksanaannya dalam dalam RMKe-12 merangkumi sembilan (9) skop projek di sembilan (9) kawasan di bandaraya Kuching dan Kota Samarahan seperti berikut:

- i. Naiktaraf Sistem Saliran di Hospital Umum, Kuching;
- ii. Naiktaraf Sistem Saliran di Kuarters Kerajaan Persekutuan, Kuching;
- iii. Rancangan Tebatan Banjir di Sg Gersik, Kuching;
- iv. Rancangan Tebatan Banjir Sg Sinjan, Kuching;
- v. Mendalamkan dan melebarkan Sg Tabuan, Kuching;
- vi. Naiktaraf Sistem Saliran di Jalan Batu Lintang, Kuching;
- vii. Naiktaraf Sistem Saliran di Sekolah Kebangsaan Muara Tuang, Samarahan;
- viii. Naiktaraf Sistem Saliran di Jalan Kuching Samarahan Expressway, Samarahan;
- ix. Mandalamkan dan melebarkan Sg. Tengah dan Sg. Minjap, Matang, Kuching.

2. Status semasa bagi projek ini adalah rekabentuk terperinci telah selesai dan sekarang di peringkat pengambilan tanah yang dilaksanakan oleh Jabatan Tanah dan Survei Sarawak. Projek (PLSB) Sungai Sarawak ini dijangka ditender pada Jun 2022 setelah proses pengambilan tanah selesai. Tempoh perlaksanaan projek ini dianggarkan selama 4 tahun.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN NURUL IZZAH BINTI ANWAR
[PERMATANG PAUH]**

TARIKH : 22 MAC 2022 (SELASA)

SOALAN

**PUAN NURUL IZZAH BINTI ANWAR [PERMATANG PAUH] minta
PERDANA MENTERI menyatakan :**

- a) Status pelancaran projek rintis perbankan masa seperti dicadangkan laporan ILMIA; dan
- b) Sama ada ia akan mengambil kira keperluan penjagaan dan kebajikan warga emas melalui pewujudan sistem ganjaran dan Perkhidmatan (cadangan KRI); dan status cadangan peningkatan umur persaraan seperti disarankan KWSP.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Ahli Yang Berhormat, ILMIA telah melaksanakan kajian yang bertajuk "*Feasibility Study : The Implementation of Time Bank Volunteering Schemes for Senior Citizens in Malaysia*" pada tahun 2019.
2. Kajian ini telahpun mengambil kira keperluan penjagaan dan kebajikan warga emas melalui sistem bank masa. Manakala bagi soalan yang diutarakan berkaitan KWSP, tiada sebarang cadangan mengenai peningkatan umur persaraan dalam kajian tersebut.
3. Laporan kajian ini dikeluarkan pada Januari 2020 dan telah dibentangkan kepada Mesyuarat Majlis Penasihat dan Perundingan Warga Emas Negara (MPPWEN) pada 17 Disember 2020 yang dipengerusikan oleh YB Menteri Kementerian Pembangunan Wanita, Keluarga dan Masyarakat (KPWKM). Mesyuarat telah memutuskan supaya projek rintis bagi pelaksanaan bank masa ini diterajui oleh KPWKM.
4. Projek rintis Perbankan Masa untuk Pusat Aktiviti Warga Emas (PAWE) di Putrajaya telah dilaksanakan pada April hingga Disember 2021 yang disediakan dan dibangunkan oleh Multimedia University (MMU) untuk merekod masa kredit yang dikumpulkan oleh ahli-ahli PAWE. Perkara ini akan diteliti dan sesi libat urus dengan pihak-pihak berkepentingan akan turut dilaksanakan sebelum pelaksanaan sepenuhnya kelak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : TUAN SYED SADDIQ BIN SYED
ABDUL RAHMAN [MUAR]**

TARIKH : 22 MAC 2022 (RABU)

SOALAN

TUAN SYED SADDIQ BIN SYED ABDUL RAHMAN [MUAR] minta **PERDANA MENTERI** menyatakan status terkini siasatan terhadap Ketua Pengarah Suruhanjaya Pencegahan Rasuah Malaysia (SPRM), dan apakah hasil keputusan siasatan ini. Adakah Kerajaan akan menubuhkan satu Suruhanjaya Siasatan Diraja atau Royal Commission of Inquiry untuk memastikan berlakunya ketelusan dan tiada konflik kepentingan dalam pentadbiran dan kuasa SPRM khususnya dalam kalangan pegawai tertinggi Kerajaan.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, isu saham yang di pertikaikan oleh banyak pihak daripada parti pembangkang sebenarnya telahpun selesai. Selain daripada itu, isu ini juga telah diputuskan dan tiada kes oleh inkuiri pihak Suruhanjaya Sekuriti Malaysia (SC). Malahan, Ketua Pesuruhjaya Suruhanjaya Pencegahan Rasuah Malaysia (KPSPRM) telah pun melalui beberapa Jawatankuasa iaitu:

- i. Lembaga Penasihat Pencegahan Rasuah (LPPR),
- ii. Jawatankuasa Mencegah Rasuah Parlimen (JKMR); dan
- iii. Jawatankuasa Aduan (JKA).

2. Menerusi satu kenyataan SC pada 18 Januari 2022, suruhanjaya itu yang selesai menjalankan siasatan menjelaskan bahawa telah menyelesaikan siasatan berdasarkan bukti yang dikumpul dan SC tidak dapat memastikan secara muktamad jika terdapat pelanggaran di bawah Seksyen 25(4) Akta Perindustrian Sekuriti (Depositori Pusat) (SICDA) telah berlaku.

3. Oleh yg demikian, tiada keperluan lagi isu pemilikan saham oleh KPSPRM ini dipertikaikan. KPSPRM juga telah mengambil tindakan undang-undang terhadap pihak yang memfitnah beliau dan kes sedang dalam peringkat mahkamah dan sebarang ulasan kes ini juga akan menimbulkan *sub judice*.

4. Kerajaan tidak melindungi individu-individu tertentu atau mengambil tindakan terhadap orang-orang yang tertentu hanya kerana untuk memuaskan hati sesetengah pihak. Sesiapa sahaja bertanggungjawab akan dihadapkan ke muka pengadilan dan mahkamahlah yang akan menentukan sama ada orang itu bersalah atau tidak.

5. Sehubungan itu, semua pihak perlu menerima keputusan SC yang menjelaskan tidak ada kes terhadap KPSPRM berhubung akaun dagangan miliknya dan keputusan hasil siasatan SC perlu menjadi panduan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN KARUPAIYA A/L MUTUSAMI
[PADANG SERAI]**

TARIKH : 22 Mac 2022 (Selasa)

SOALAN

TUAN KARUPAIYA A/L MUTUSAMI [PADANG SERAI] minta **PERDANA MENTERI** menyatakan penjelasan mengenai masalah yang dialami oleh rakyat yang tidak dapat meneruskan perkahwinan baharu selepas bercerai kerana pasangan lama telah melarikan diri dan proses perceraian tidak dapat dilakukan di mahkamah.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, alasan bagi permohonan untuk perceraian bagi pasangan bukan beragama Islam adalah sebagaimana yang diperuntukan di bawah seksyen 53 dibaca dengan perenggan 54(1)(c) Akta Memperbaharui Undang-Undang (Perkahwinan & Perceraian) 1976 seperti berikut:

Breakdown of marriage to be sole ground for divorce

53. (1) Either party to a marriage may petition for a divorce on the ground that the marriage has irretrievably broken down.

(2) The court hearing such petition shall, so far as it reasonably can, inquire into the facts alleged as causing or leading to the breakdown of the marriage and, if satisfied that the circumstances make it just and reasonable to do so, make a decree for its dissolution.

Proof of breakdown

54. (1) In its inquiry into the facts and circumstances alleged as causing or leading to the breakdown of the marriage, the court shall have regard to one or more of the following facts, that is to say:

(c) that the respondent has deserted the petitioner for a continuous period of at least two years immediately preceding the presentation of the petition;

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN CHANG LIH KANG [TANJONG MALIM]

TARIKH : 22 MAC 2022 (SELASA)

SOALAN

TUAN CHANG LIH KANG [TANJONG MALIM] minta **PERDANA MENTERI** menyatakan perubahan bilangan penduduk miskin tegar sejak pandemik COVID-19 berlaku pada tahun 2020. Apakah langkah yang diambil oleh Kementerian untuk mengatasi masalah miskin tegar.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman semua Ahli Yang Berhormat, berdasarkan metodologi (PGK) 2019, nilai PGK peringkat nasional adalah RM2,208 bagi isi rumah miskin manakala RM1,169 bagi isi rumah miskin tegar. Nilai ini adalah berdasarkan saiz isi rumah seramai 4 orang.
2. Jabatan Perangkaan Malaysia telah menganggarkan bahawa kadar kemiskinan tegar meningkat daripada 0.4% atau 27.2 ribu isi rumah pada tahun 2019 kepada anggaran 1% atau 78.0 ribu pada tahun 2020 akibat kesan pandemik COVID-19 dan senario ekonomi semasa.
3. Sepertimana Yang Berhormat sedia maklum, YAB Perdana Menteri dalam pembentangan Rancangan Malaysia Kedua Belas pada 27 September 2021, telah mengumumkan bahawa Kerajaan akan melaksanakan program pembasmian kemiskinan tegar menggunakan pendekatan keseluruhan negara atau dengan izin, *whole-of-nation approach*.
4. Bagi tujuan pelaksanaan program pembasmian kemiskinan tegar ini, pangkalan data kemiskinan yang bersepadu dan berpusat iaitu eKasih akan digunakan. Pihak Unit Penyelarasan Pelaksanaan, Jabatan Perdana Menteri (ICU, JPM) sedang membuat pemutihan data isi rumah miskin tegar ini. Sehingga 15 Februari 2022, seramai 251,089 isi rumah miskin tegar telah didaftarkan.
5. Program Pembasmian Kemiskinan Tegar Keluarga Malaysia (BMTKM) yang akan mula dilaksanakan April 2022 melibatkan 480 lokaliti rintis di seluruh negara. Lokaliti bagi program pembasmian kemiskinan akan merangkumi lokaliti di kawasan bandar dan luar bandar, masyarakat Bumiputera, Cina, India, dan etnik-etnik lain di Semenanjung Malaysia, Sabah dan Sarawak.

6. Program ini akan menggunakan pendekatan secara holistik melibatkan kerjasama pelbagai pihak termasuk Kementerian dan agensi pelaksanaan, Kerajaan negeri, syarikat berkaitan Kerajaan (GLC), sektor swasta dan industri, pertubuhan masyarakat sivil (CSO), organisasi berasa komuniti (CBO) dan akademik. Antara inisiatif dan pendekatan khusus pelaksanaan BMTKM termasuk:

- a. Menubuhkan Unit Kemiskinan khusus pada peringkat Persekutuan, Negeri dan Daerah;
- b. Mewujudkan pangkalan data kemiskinan yang bersepadu dan berpusat;
- c. Mempertingkatkan program pendekatan dari bawah ke atas melalui pendekatan keseluruhan negara (*whole-of-nation approach*); dan
- d. Melaksanakan penyelesaian kemiskinan pada peringkat akar umbi.

7. Program yang bertujuan membasmi miskin tegar pada tahun 2025 ini akan bermula dengan fasa 1 melibatkan 80 lokaliti rintis di seluruh negara. Fasa 2 dan Fasa 3 akan bermula pada September dan Disember 2022. Fasa 4 sehingga fasa 6 akan dilaksanakan pada tahun 2023.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN BARU BIAN (SELANGAU)

TARIKH : 22 MAC 2022 (SELASA)

SOALAN

TUAN BARU BIAN [SELANGAU] minta **MENTERI LUAR NEGERI** menyatakan apakah usaha Kerajaan untuk berbincang dengan Kerajaan Brunei dalam pembukaan jalan sempadan yang menghubungkan Lawas dan Limbang kerana ia adalah satu-satunya jalan perhubungan dari Lawas dan Limbang ke bandar terdekat di Sarawak Miri.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Selangau atas pertanyaan yang dikemukakan.

Tuan Yang di-Pertua,

2. Kerajaan sentiasa peka dan prihatin dengan masalah-masalah pergerakan rakyat di Sabah dan Sarawak yang bergantung dengan pembukaan jalan sempadan darat antara kedua-dua negeri dengan Brunei Darussalam.

3. Oleh yang demikian, semasa Lawatan Rasmi YAB Perdana Menteri ke Brunei Darussalam pada 14 – 15 Februari 2022, kedua-dua pihak telah bersetuju untuk melaksanakan inisiatif *Vaccinated Travel Lane* (VTL) Udara dan Darat dalam masa terdekat. Langkah ini adalah bagi memudahkan pergerakan rentas sempadan serta merancakkan semula kerjasama ekonomi antara kedua-dua negara.

4. Berkaitan dengan masalah pergerakan di Sabah dan Sarawak, kedua-dua pemimpin telah berbincang mengenai penggunaan VTL Darat di kawasan sempadan Sarawak dan Brunei yang bertujuan untuk memudahkan pergerakan rakyat yang terkesan akibat pandemik COVID-19 sejak 2020. VTL Darat ini secara langsung dapat menghubungkan Miri, Limbang dan Lawas dan akan dilaksanakan dalam masa terdekat setelah pelaksanaan VTL Udara antara Malaysia dan Brunei.

5. Dalam hal ini, kementerian dan agensi berkaitan antara kedua-dua negara sedang giat mengadakan perbincangan lanjut untuk memuktamadkan inisiatif VTL tersebut terutamanya dalam meneliti dan mengharmonikan pelaksanaan SOP bagi memudahkan pergerakan rakyat merentas sempadan. Mesyuarat Jawatankuasa Bersama VTL Udara Malaysia-Brunei telah diadakan pada 24 Februari 2022 dan mesyuarat kedua dijangka akan diadakan pada 3 Mac 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : TUAN HAJI MOHAMAD BIN SABU
[KOTA RAJA]**

TARIKH : 16 MAC 2022 (RABU)

SOALAN

TUAN HAJI MOHAMAD BIN SABU [KOTA RAJA] minta **PERDANA MENTERI** menyatakan adakah wujud campur tangan kuasa asing yang mempengaruhi dasar dan keputusan-keputusan Kerajaan Malaysia berikutan pengguguran kes bekas Pengarah Organisasi Perisikan Luar Malaysia (MEIO), Datuk Hasanah Abdul Hamid dan laporan kehilangan RM25 juta wang yang dirampas dari beliau dalam simpanan Suruhanjaya Pencegahan Rasuah Malaysia (SPRM).

**[JAWAPAN JABATAN PEGUAM NEGARA ADALAH BERHUBUNG
DENGAN KEPUTUSAN PENGGUGURAN KES TERSEBUT]**

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Keputusan melepaskan tanpa membebaskan (DNAA) Datuk Hasanah Abdul Hamid daripada pertuduhan melakukan pecah amanah wang berjumlah AS \$12.1 juta adalah selaras dengan Perkara 145 Perlembagaan Persekutuan iaitu kuasa Peguam Negara untuk memulakan, menjalankan atau memberhentikan apa-apa prosiding di mahkamah. Dalam membuat keputusan ini, Peguam Negara melaksanakan budibicaranya berasaskan keterangan yang diperolehi oleh pihak penguatkuasa, perkembangan dan keterangan baharu yang wujud semasa perbicaraan kes ini berlangsung. Oleh itu, adalah sama sekali tidak benar untuk menyatakan bahawa keputusan DNAA tersebut dibuat kerana dipengaruhi oleh kuasa asing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN NGA KOR MING [TELUK INTAN]

TARIKH : 22 MAC 2022 (SELASA)

SOALAN

TUAN NGA KOR MING [TELUK INTAN] minta **PERDANA MENTERI** menyatakan :-

- (a) adakah Kerajaan bersetuju supaya Suruhanjaya Pencegahan Rasuah Malaysia (SPRM) diletak di bawah penyeliaan Parlimen; dan
- (b) apakah langkah-langkah yang sedang diambil oleh Kerajaan untuk memperbaiki kedudukan negara dalam International Transparency Index Ranking yang kini menyaksikan kedudukan negara merosot jatuh dari tangga 51 hingga 62.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, berdasarkan kepada Mesyuarat JKKMAR Siri 11 Bil. 1 Tahun 2020 dan Siri 12 Bil 2. Tahun 2020 telah menimbangkan berkenaan cadangan bagi memperkasakan SPRM khususnya dalam Pelantikan Ketua Pesuruhjaya SPRM dan Penubuhan Suruhanjaya Perkhidmatan Pencegahan Rasuah (SPPR). Kedua-dua Mesyuarat JKKMAR telah menimbangkan kedua-dua cadangan ini dan memutuskan bahawa kajian terperinci serta perbincangan lanjut SPRM dengan Jabatan Peguam Negara perlu diadakan berhubung kedua-dua cadangan pindaan ini. Sesi libat urus bersama beberapa agensi masih lagi giat dilaksanakan. Suruhanjaya ini juga akur dan terikat dengan peruntukan Perkara 159 (3) Perlembagaan Persekutuan dimana pindaan ini memerlukan sokongan dengan undi sebanyak tidak kurang daripada 2/3 daripada jumlah bilangan ahli Majlis Parlimen.

Indeks Persepsi Rasuah (CPI) merupakan barometer antarabangsa yang diterbitkan oleh Transparency International (TI) yang mengukur tahap persepsi rasuah dalam badan awam termasuk pegawai dan Anggota Pentadbiran bagi negara-negara di seluruh dunia. Walau bagaimanapun, pengukuran CPI dilaksanakan berdasarkan persepsi melalui kajian oleh institusi-institusi antarabangsa. Indeks ini adalah untuk memberi gambaran kepada Kerajaan supaya usaha penambahbaikan tadbir urus, integriti dan antirasuah terus dilaksanakan merentasi pelbagai sektor awam, swasta termasuk politik bagi memberi kesan kepada daya saing serta ekonomi negara.

CPI Malaysia untuk tahun 2021 dikira berdasarkan 9 daripada 13 kajian yang dilaksanakan oleh pelbagai agensi antarabangsa. Laporan

tersebut menunjukkan bahawa Malaysia menduduki tempat ke-2 terbaik selepas Singapura di antara 9 negara ASEAN yang terlibat. Antara perkara yang mempengaruhi skor dan kedudukan negara dalam CPI adalah soalan berbeza yang digunakan antara negara, responden atau kumpulan sasar serta jumlah penglibatan negara yang berbeza setiap tahun. Sebagai contoh, kajian CPI tahun 2021 tidak melibatkan negara Brunei.

Kerajaan melalui Pusat Governans, Integriti dan Antirasuah Nasional (GIACC) telah mengadakan beberapa sesi libat urus dengan pihak-pihak berkepentingan agar laporan CPI tersebut lebih adil dan dapat memberi gambaran yang sebenar. Kesediaan Malaysia untuk dinilai dalam CPI 2021 menunjukkan ketelusan dan komitmen Malaysia dalam penambahbaikan tadbir urus. Sehubungan itu, Kerajaan kekal komited untuk melaksanakan inisiatif yang telah digariskan di bawah Pelan Antirasuah Nasional (NACP). Walau bagaimanapun, harus kita ingat bahawa usaha-usaha penambahbaikan adalah bersifat jangka panjang dan hasilnya juga akan hanya dapat dilihat dalam jangka masa akan datang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : YB DATO' NGEH KOO HAM (BERUAS)

TARIKH : 22 MAC 2022 (SELASA)

SOALAN

DATO' NGEH KOO HAM [BERUAS] minta **MENTERI KANAN KERJA RAYA** menyatakan bilakah Lebuhraya Pantai Barat (West Coast Expressway) dijangka akan siap dan kenapa ia telah lewat disiapkan.

JAWAPAN

Tuan Yang Di-Pertua,

Untuk makluman Ahli Yang Berhormat, jajaran Lebuhraya Persisiran Pantai Barat (WCE) ini merentasi dua (2) buah negeri iaitu Negeri Selangor dan Negeri Perak sejauh 316 km di bina di sepanjang persisiran pantai barat untuk kemudahan penduduk setempat dan juga pengguna lebuhraya ke utara. Panjang jajaran Lebuhraya WCE yang dilaksanakan secara penswastaan oleh *West Coast Expressway Sdn. Bhd.* (WCESB) adalah sepanjang 233 km manakala jajaran sepanjang 81.5km untuk menaiktaraf jalan sedia ada (FR5) dilaksanakan menggunakan peruntukan Kerajaan melalui Jabatan Kerja Raya.

Untuk makluman Ahli Yang Berhormat, berkenaan jajaran yang menggunakan peruntukan Kerajaan melalui Jabatan Kerja Raya melibatkan tiga (3) buah jajaran projek iaitu satu jajaran telah disiapkan pada 2018 manakala dua jajaran lagi sedang dalam pembinaan. Jajaran projek yang dimaksudkan adalah seperti berikut:

- i. Projek Menaiktaraf Jalan Persekutuan FR5 Dari Sabak Bernam Ke Hutan Melintang sepanjang 5km diluluskan dengan kos projek sebanyak RM166 juta telah siap pembinaannya pada 25.6.2018;
- ii. Kerja-kerja Menaiktaraf Jalan Persekutuan FT005 (Teluk Intan Ke Kg.Lekir) Perak Darul Ridzuan sepanjang 31.5km diluluskan dengan kos projek sebanyak RM706.55 juta. Projek ini sudah mencapai kemajuan fizikal sebanyak 91.21% dan;
- iii. Projek Menaiktaraf Jalan Persekutuan FR5 Dari Tanjong Karang Ke Sabak Bernam, Selangor sepanjang 45km diluluskan dengan kos projek sebanyak RM807.7 juta. Projek ini dijangka akan siap pada 26.3.2022 dengan kemajuan fizikal semasa di tapak ialah 99.77%.

Manakala berkenaan dengan jajaran yang dilaksanakan secara penswastaan, pembukaan WCE secara berperingkat telah bermula pada tahun 2019 melibatkan Seksyen 5 di Selangor (dari Persimpangan Bandar Bukit Raja ke Persimpangan Kapar) serta Seksyen 8, 9 dan 10 di Negeri Perak (dari Persimpangan Hutan Melintang ke Persimpangan Teluk Intan dan dari Persimpangan Kampung Lekir ke Persimpangan Beruas). Kemajuan keseluruhan projek yang berakhir 25 Januari 2022 adalah 77.79%. Kesemua Seksyen WCE di bawah penswastaan ini dijadualkan siap sepenuhnya pada tahun 2025 di mana penyiapan terakhir adalah melibatkan jajaran Seksyen 7 di Persimpangan Tanjong Karang, Selangor. Pada masa kini, kerja-kerja pembinaan sedang dijalankan di bahagian jajaran yang belum dibuka melibatkan kerja tanah, pembinaan struktur dan jambatan, perparitan, cerun, turapan, kerja mekanikal dan elektrik, perabot jalan, bangunan dan lain-lain.

Untuk makluman Ahli Yang Berhormat, kelewatan yang berlaku, antaranya disebabkan isu pengambilan tanah serta penentuan jajaran lebuh raya. Kemajuan pembinaan juga agak terkesan dengan pelaksanaan Perintah Kawalan Pergerakan (PKP) serta Perintah Kawalan Pergerakan Diperketat (PKPD) bagi mengekang pandemik Covid-19. Pada masa kini, kerja-kerja pembinaan sedang dijalankan di bahagian jajaran yang belum dibuka melibatkan kerja tanah, pembinaan struktur dan jambatan, perparitan, cerun, turapan, kerja mekanikal dan elektrik, perabot jalan, bangunan dan lain-lain.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN STEVEN CHOONG SHIAU YOON
[TEBRAU]**

TARIKH : 22 MAC 2022 (SELASA)

SOALAN

TUAN STEVEN CHOONG SHIAU YOON [TEBRAU] minta **PERDANA MENTERI** menyatakan apakah kesannya terhadap ekonomi Malaysia pada jangka masa panjang memandangkan ekonomi negara banyak bergantung kepada bahan api fosil dan kelapa sawit selepas pengumuman oleh Kerajaan Malaysia agar tekad untuk mencapai pengurangan kadar pelepasan bersih sifar karbon (net zero carbon emission) pada tahun 2050 supaya sektor yang terjejas dapat merangka semula strategi perniagaan mereka seawal mungkin.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Kerajaan telah mengumumkan aspirasi negara untuk mencapai pelepasan GHG sifar bersih atau *net-zero GHG emissions* seawal-awalnya tahun 2050. *Net-zero emissions* adalah merujuk kepada pengimbangan pelepasan dan penyerapan gas rumah kaca (GHG). Perincian langkah-langkah bagi mencapai sasaran ini tertakluk kepada hasil kajian Strategi Jangka Masa Panjang Pembangunan Rendah Karbon (LT-LEDS) yang akan dimuktamadkan pada akhir 2022 oleh Kementerian Alam Sekitar dan Air.

2. Sektor utama yang menyumbang kepada pelepasan GHG adalah sektor tenaga yang meliputi aktiviti-aktiviti pembekalan elektrik, pengangkutan, dan industri minyak dan gas asli, sektor pertanian serta sektor industri pembuatan dan pemprosesan. Rancangan Malaysia ke-12 telah meletakkan asas dalam mencapai aspirasi *net-zero* dengan memberi tumpuan kepada mempercepat pertumbuhan hijau dan mempertingkatkan kemampanan tenaga. Pendekatan ini akan memacu pencapaian negara rendah karbon, melindungi khazanah semula jadi dan meningkatkan daya tahan terhadap perubahan iklim dan bencana.

3. Dasar Tenaga Negara, 2021-2040 (DTN) sedang dimuktamadkan dalam usaha mengurangkan kebergantungan kepada pendapatan berasaskan petroleum dan komoditi. Keseimbangan ini penting kerana Malaysia sebagai negara membangun perlu memastikan ketahanan fiskal dan kedudukan ekonomi seiring dengan kesaksamaan sosial dalam menghadapi cabaran trilema tenaga iaitu jaminan bekalan, mampu bayar dan kelestarian alam sekitar. Walaupun industri minyak dan gas dijangka akan terus memainkan peranan penting di dalam campuran tenaga (*energy mix*) negara, Pelan Hala Tuju Gas Asli, 2021-2040 yang digubal selaras dengan DTN menekankan keutamaan terhadap gas asli dan gas asli cecair (LNG) sebagai pilihan bahan api fosil yang lebih bersih bagi

mengurangkan pelepasan GHG dan mengehadkan peningkatan suhu global serta alternatif dalam trend peralihan daripada bahan api fosil. Selain itu, potensi sumber tenaga baharu seperti hidrogen turut akan diteroka bagi meningkatkan sumber tenaga bersih dan mampan.

4. Kerajaan telah memberikan komitmen untuk tidak membina loji jana kuasa arang batu yang baharu mulai tahun 2040. Sebaliknya, Kerajaan akan meningkatkan kapasiti terpasang tenaga boleh baharu (TBB) bagi memenuhi sasaran 31% TBB daripada jumlah kapasiti terpasang pada tahun 2025 dan 40% pada tahun 2040. Kapasiti terpasang semasa TBB ialah 8,450MW dan diunjurkan mencapai 19,422MW pada tahun 2040. Antara sumber TBB yang telah dikenalpasti untuk dibangunkan termasuk hidro, solar, biogas dan biojisim. Teknologi sistem penyimpanan tenaga (*battery energy storage*) turut akan diperkenalkan bagi memastikan sumber tenaga elektrik yang terjamin dan berkualiti.

5. Kerajaan sedar kelapa sawit merupakan tanaman agrikomoditi terbesar di Malaysia dari segi keluasan, hasil dan pendapatan eksport. Pada tahun 2021, jumlah keluasan tanaman sawit mencapai 5.8 juta hektar yang merupakan 83% daripada jumlah keluasan tanaman agrikomoditi negara. Sumbangan KDNK daripada industri sawit adalah sebanyak RM12.3 bilion atau 3.3% daripada jumlah KDNK Malaysia pada tahun 2021, yang merupakan sumbangan terbesar daripada semua tanaman agrikomoditi. Pendapatan eksport sawit pada tahun 2021 pula adalah sebanyak RM108.5 bilion yang dihasilkan daripada eksport 25.4 juta tan minyak sawit dan produk berasaskan sawit.

6. Industri sawit merupakan industri strategik dan penyumbang utama kepada ekonomi negara. Kerajaan telah melaksanakan pelbagai usaha untuk menjadikan industri ini lebih mampan demi memastikan kelestarian alam sekitar. Malaysia telah mengehadkan keluasan tanaman kelapa sawit kepada 6.5 juta hektar bagi melindungi biodiversiti serta menyokong usaha untuk mengekalkan 50% daripada keluasan tanah negara dilitupi kawasan berhutan sebagaimana komitmen yang dibuat semasa *Rio Earth Summit* pada tahun 1992. Penanaman baharu sawit di atas kawasan baharu tanah gambut juga turut dilarang.

7. Dalam tempoh RMKe-12, kerajaan memberi tumpuan memajukan industri hiliran sawit bagi meningkatkan pengeluaran produk-produk yang mempunyai nilai ditambah yang tinggi untuk memastikan sumbangan industri ini kepada ekonomi negara terus meningkat. Di samping itu, Pensijilan Minyak Sawit Mampan Malaysia (*Malaysian Sustainable Palm Oil - MSPO*) telah dilaksanakan secara mandatori mulai Januari 2020 bagi semua perladangan sawit termasuk pekebun kecil untuk memastikan pengurusan penanaman kelapa sawit dilaksanakan mengikut amalan pertanian yang terbaik. Kerajaan juga telah menetapkan dasar penggunaan biodiesel sawit sebagai alternatif sumber hijau bagi menggantikan penggunaan bahan api fosil. Selain itu, kerajaan turut menumpukan kepada pembangunan industri biojisim termasuk sumber daripada kelapa sawit yang memainkan peranan penting dalam mewujudkan ekonomi kitaran, meningkatkan nilai tambah bagi sektor agrikomoditi serta mengurangkan pelepasan karbon.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN WONG CHEN
(SUBANG)**

TARIKH : 22 MAC 2022 (SELASA)

SOALAN

Tuan Wong Chen (Subang) minta MENTERI LUAR NEGERI menyatakan keputusan dan memberikan laporan penyertaan Kerajaan dalam Kajian Serantau bagi Global Compact for Migration (GCM) yang berlangsung pada April 2021.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Subang atas pertanyaan yang dikemukakan.

2. Untuk makluman Dewan yang mulia ini, pada 10 hingga 12 Mac 2021, delegasi Malaysia yang terdiri daripada para pegawai daripada Kementerian Luar Negeri, Kementerian Dalam Negeri (KDN) dan Kementerian Sumber Manusia (KSM) telah menyertai persidangan *Asia-Pacific Regional Review of Implementation of the Global Compact for Safe, Orderly and Regular Migration (GCM)* secara atas talian.
3. Persidangan selama 3 hari ini telah dianjurkan oleh *United Nations Economic and Social Commission for Asia and the Pacific (UNESCAP)* dan disertai oleh 34 buah negara dan 66 buah organisasi antarabangsa, badan bukan kerajaan dan masyarakat sivil. Antara negara-negara anggota ASEAN lain yang turut serta dalam persidangan ini ialah Filipina, Indonesia, Kemboja, Myanmar, Thailand dan Vietnam.
4. Matlamat utama persidangan ini adalah untuk membincangkan langkah konkrit dalam menyelaraskan migrasi dengan pembangunan mampan dan menghormati hak asasi manusia dan buruh, semasa dan selepas era pandemik COVID-19. Sepanjang 3 hari persidangan berlangsung, beberapa perbincangan tematik yang memfokuskan kepada kemajuan serta cabaran yang dihadapi dalam pelaksanaan GCM di semua peringkat termasuk sektor awam dan swasta telah dibincangkan.
5. Persidangan ini telah menyimpulkan bahawa pandemik COVID-19 telah memberikan kesan negatif ke arah usaha mencapai sasaran Agenda Pembangunan Mampan 2030. Sehubungan itu, para peserta persidangan menyeru supaya kolaborasi yang lebih mantap di kalangan Kerajaan dalam pelaksanaan GCM, dengan melaksanakan hak migrasi yang responsif terhadap gender dan peka terhadap kanak-kanak. Maklum balas yang diberikan semasa persidangan ini seterusnya akan

diketengahkan dalam *International Migration Review Forum* (IRMF) yang akan diadakan buat julung kalinya pada Mei 2022 di New York.

6. Untuk makluman Dewan yang mulia ini, GCM yang merupakan satu perjanjian yang tidak mengikat (*non-binding agreement*), telah diterima pakai oleh negara-negara anggota semasa Perhimpunan Agung Pertubuhan Bangsa-Bangsa Bersatu (UNGA) pada tahun 2018. Umumnya, GCM bertujuan menambah baik tadbir urus migrasi, menangani cabaran yang dikaitkan dengan migrasi pada hari ini, dan juga untuk mencapai sasaran Agenda Pembangunan Mampan 2030, yang memberikan fokus ke arah memudahkan migrasi dan memastikan migran bermigrasi secara bertanggungjawab, teratur dan selamat.

7. Malaysia menyertai persidangan *Asia-Pacific Regional Review of Implementation of the GCM* untuk memastikan bahawa kepentingan negara dalam isu migrasi ini dilindungi berdasarkan rundingan bersama KDN dan KSM. Ia juga telah memberikan peluang kepada negara untuk berkongsi amalan baik, cabaran dan pengalaman serta meningkatkan langkah kolektif berkaitan isu migrasi di rantau ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN KHALID BIN ABD SAMAD
[SHAH ALAM]**

TARIKH : 22 MAC 2022 (SELASA)

SOALAN :

YB TUAN KHALID BIN ABD SAMAD [SHAH ALAM] minta **PERDANA MENTERI** menyatakan apakah usaha Kerajaan untuk memastikan elaun minima pelatih dalam kamar di Malaysia selaras dengan paras gaji minima negara.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, urusan berhubung pelatih dalam kamar diperuntukkan dalam Akta Profesion Undang-Undang 1976 [Akta 166]. Subseksyen (3) kepada seksyen 12 Akta tersebut memperuntukkan seperti yang berikut:

Tempoh latihan orang berkelayakan

*12. (3) Tiada seseorang pun berkelayakan boleh, tanpa kebenaran khas secara bertulis daripada Majlis Peguam, memegang apa-apa jawatan atau bertugas dalam apa-apa pekerjaan dari apa-apa jenis, sama ada sepenuh masa atau selainnya, dalam tempoh latihannya, **tetapi tiada apa-apa jua dalam subseksyen ini boleh menghalang seseorang pelatih daripada menerima saraan daripada pengajarnya.***

Oleh itu, dalam hal ini, Akta 166 tidak memperuntukkan kadar minimum saraan yang layak diterima oleh pelatih dalam kamar. Kadar saraan adalah bergantung kepada penetapan yang dibuat oleh pengajar pelatih dalam kamar tersebut dan tidak terikat dalam suatu jumlah yang tertentu.

Berhubung dengan usaha Kerajaan untuk memastikan elaun minima pelatih dalam kamar di Malaysia selaras dengan paras gaji minima negara, pihak Kerajaan mengalu-alukan sebarang cadangan berhubung perkara ini terutamanya daripada Majlis Peguam.

Sekian, terima kasih.